

一屋

七十八

# 永樂大典

卷一萬九千七百三十七

之一萬九千七百三十九

217

1891 3 10

永樂大典卷之一萬九千七百三十七 一屋

錄

沙門灌頂國清百錄

序 先師以陳太建七年。歲次乙未。初隱天台所止之峯。舊名

佛隴。詢訪土人云。遊其山者多見佛像。故相傳因而成稱。至太建十年。歲在戊戌。降陳宣帝敕。名修禪寺。吏部尚書毛喜題篆榜。送安寺門。到大隋開皇十八年。其歲戊午。太尉晉王於山下為先師創寺。因山為稱。是曰天台。王登尊極。以大業元年。龍集乙丑。敕江陽名僧云。昔為智者創寺。權因山稱。今須立名。經論之內有何勝目。可各述所懷。朕自詳擇。諸僧表兩名。一云禪門。一云五淨居。其表未奏。而僧使智瑛啓國清之瑞。敕云。此是我先師之靈瑞。即用敕取江都宮大牙殿榜。皆以雌黃書。以大篆。遣兼內史通事舍人盧政力送安寺門。國清之稱。從而為始。先師神光而生。結跏而滅。處證妙沙。出作帝師。備是渚宮法論。會稽智果國清灌頂等三傳所載。又沙門智寂編集。先師遺遊信命。搜訪未周。而智寂身故。筆墨之功。與氣

俱棄。余覽其草本，續更撰次諸經方法等，合得一百條，呼為國清百錄。貽示後昆，知盛德之在茲。立制法第一。敬禮法第二。普禮法第三。請觀世音懺法第四。金光明懺法第五。方等懺法第六。訓知事人第七。陳宣帝敕留第八。宣帝敕施物第九。宣帝敕給寺名第十。陳少主敕迎第十一。少主口敕第十二。凡十二口敕。少主后沈手令書第十三。少主太子請戒疏第十四。陳永陽王手自書第十五。永陽王解講疏第十六。永陽王手書屬人第十七。陳儀同公沈君理請疏第十八。左僕射徐陵書第十九。吏部尚書毛喜書第二十。放生碑文第二十一。隋文皇帝敕書第二十二。秦孝王書第二十三。晉王初迎書第二十四。王治寺書第二十五。王受戒疏第二十六。王謝書第二十七。王叅書第二十八。王留住書第二十九。王重留書第三十。王許行書第三十一。蔣州僧論事書第三十二。王述蔣州僧書第三十三。王答蔣州事第三十四。述匡山書第三十五。王許匡山書第三十六。王與匡山寺書第三十七。王謝法門書第三十八。王遣使匡山叅書第三十九。王重遣匡山叅書第四十。王遣使潭州叅書第四十一。王遣使荊州叅書第四十二。王入朝遣使叅書第

四十三。文皇帝施寺額敕書第四十四。王在京重遣書第四十五。王從駕東嶽遣書第四十六。王還鎮迎書第四十七。王謝天冠書并請議書第四十八。讓請議書第四十九。王重請義書第五十。立制法第一。并序夫新衣無孔。不可補之以縷。宿殖淳善。不可加之以罰。吾初在浮度中。處金陵前。入天台。諸來法徒。各集道業。尚不須軟語勸進。况立制肅之。後入天台觀。呼晚學。如新猿馬。若不控鑠。日甚月增。為成就故。失二治一。蒲鞭示耻。非欲苦之。今訓諸學者。略示十條。後若妨起。應須增損。眾共裁之。第一夫根性不同。或獨行得道。或依眾解脫。若依眾者。當脩三行。一依堂坐禪。二別揚懺悔。三知僧事。此三行人。三衣六物。道具具足。隨有一行。則可容受。若衣服有闕。都無一行。則不同止。第二依堂之僧。本以四時坐禪。六時禮佛。此為恒務。禪禮十時。一不可闕。其別行僧。行法竟三日。外即應依眾。十時若禮佛不及一時。罰三禮對眾懺。若全失一時。罰十禮對眾懺。若全失六時。罰一。次維那。四時坐禪。亦如是。除疾礙。先白知事。則不罰。第三六時禮佛。大僧應被入眾衣。衣無鱗隴。若縵衣。悉不得。三下早集。敷坐。執香爐。胡跪。未唱誦。不得誦。未隨意。不散語話。叩頭。禪指。頓曳屣履。起伏參差。悉罰十禮對眾懺。第四別行之意。以在眾。

為緩。故精進勤脩。四種三昧。而假託道場。不稱別行之意。檢校得實。罰一次維那。第五其知事之僧。本為安立利益。反作損耗。割眾潤己。自任恩情。若非理侵一毫。雖是眾用。而不開白。檢校得實。不同止。第六其二時食者。若身無病。病不頓卧。病已差。皆須出堂。不得請食入眾。食器聽用鐵瓦。薰油二器。甌。椀。匙。筯。悉不得以骨角竹木。瓢。染皮。蚌。悉不得上堂。又不得擅觸已鉢。吸啜等聲。含食語話。自為求索。私將醬菜。眾中獨噉。犯者罰三禮對眾懺。第七其大僧小戒。近行遠行。寺內寺外。悉不得盜噉魚肉辛酒。非時而食。察得實。不同止。除病危篤。瞻病用醫。語出寺外。投治。則不罰。第八僧名和合。柔忍。故和義讓。故合。不得諍計。高聲。醜言。動色。兩競者。各罰三十拜對眾懺。不應對者。不罰。身手互相加者。不問輕重。皆不同止。不動手者。不罰。第九若犯重者。依律治。若橫相誣。被誣者。不罰。作誣者。不同止。若學未入眾時。過眾主。不受學眾。未攝故。彼自言比丘故。入眾來犯重。誣他者。治罰如前。第十依經立方。見病處藥。非於方吐於藥。有何益乎。若上來九制聽懺者。屢懺無慙愧心。不能自新。此是吐藥之人。宜令出眾。若能改革。後亦聽還。若犯諸制。捍不肯懺。此是非方之人。不從眾網。則不同止。敬禮法第二。并序此法。正依龍樹毗婆沙。傍潤諸經意。於

一日一夜存略適時。朝午略敬禮用所為三。晡用敬禮略所為。初夜全用。午時十佛代。中夜後夜普禮。一心敬禮常住三寶。嚴持香華如法供養。願此香華雲徧滿十方界。一一諸佛土。無量香莊嚴。具足菩薩道。成就如來香供養已。如法行道。行道竟。敬禮常住三寶。歎佛呪願。呪願云。色如閻浮金。面逾淨滿月。身光智慧明。所照無邊際。摧破魔怨眾。善化諸人天。乘彼八正船。能度難度者。聞名得不退。是故稽首禮。歎佛功德。三界天龍。皇國七廟。師僧父母。造寺檀越。一切怨親。等會真如。供成佛果。上座當用智力自在說。敬禮常寂光土毗盧遮那徧法界諸佛。敬禮蓮華藏海盧舍那徧法界諸佛。敬禮娑婆世界釋迦牟尼徧法界諸佛。敬禮東方無憂世界善德如來徧法界諸佛。敬禮南方歡喜世界旃檀德佛徧法界諸佛。敬禮西方名善世界無量名佛徧法界諸佛。敬禮北方無動世界相德如來徧法界諸佛。敬禮東南方月明世界無憂德佛徧法界諸佛。敬禮西南方眾相世界寶施如來徧法界諸佛。敬禮西北方眾音世界華德如來徧法界諸佛。敬禮東北方安隱世界三乘行佛徧法界諸佛。敬禮下方廣大世界德如來徧法界諸佛。敬禮上方眾月世界廣眾德佛徧法界諸佛。敬禮無憂道樹下毗婆尸佛徧法界諸佛。

敬禮邠陀利樹下尸棄如來。徧法界諸佛。敬禮娑羅道樹下毗首尸佛。徧法界諸佛。敬禮尸利沙樹下迦求村馱佛。徧法界諸佛。敬禮優曇鉢樹下迦那含牟尼佛。徧法界諸佛。敬禮拘樓陀樹下迦葉如來。徧法界諸佛。敬禮那迦道樹下彌勒如來。徧法界諸佛。敬禮舍利形像支提寶塔。敬禮十二部經清淨妙法。敬禮三乘得道一切賢聖僧。為梵釋四王八部官屬持國護法諸天神等。願威權自在。顯揚佛事。敬禮常住諸佛。為諸龍王等。願風雨順時。含生蒙潤。敬禮常住諸佛。為天台山王王及眷屬。奉麓林野一切幽祇。願冥祐伽藍。作大利益。敬禮常住諸佛。為武元皇帝。元明皇太后。七廟聖靈。願神遊淨國。位入法雲。敬禮常住諸佛。為至尊聖御。願寶曆遐長。天祚永久。慈臨萬國。拯濟四生。敬禮常住諸佛。為皇后尊體。願百福莊嚴。千聖擁護。敬禮常住諸佛。為皇太子殿下。願保國安民。福延萬世。敬禮常住諸佛。為在朝群臣百司五等。願翼贊皇家。務盡臣節。敬禮常住諸佛。為經生父母。歷世師僧。四輩檀越。財法二恩。願早起苦海。永出愛河。敬禮常住諸佛。為基業施主。命過檀越。往化諸僧等。願六度早圓。七財具足。敬禮常住諸佛。為州牧使君。六曹叅佐。此縣鎮將五鄉士女。願風祥雨順。闔境豐寧。敬禮常住諸佛。



為創寺已來。開治墾伐。田國厨展。行住運動。凡所侵傷。願命過歸真。將  
來無對。敬禮常住諸佛。為法界怨親識性平等。斷除三障。誠心悔罪。  
至心懺悔。十方無量佛。所知無不盡。我今悉於前。發露諸黑惡。三三合九  
種。從三煩惱起。今身若先身。是罪悉懺悔。於三惡道中。若應受業報。願於  
今身償。不入惡道。受懺悔已禮諸佛。至心勸請十方一切佛。現在得道  
者。今請轉法輪。安樂諸群生。十方一切佛。若欲捨壽命。我今頭面禮。勸請  
命久住。勸請已禮諸佛。至心隨喜。所有布施福。持戒脩禪行。從身口意  
生。去來今所有。習學三乘人。成就三乘者。一切凡夫福。皆隨而歡喜。歡喜  
已禮諸佛。至心迴向。我所有福德。一切皆和合。為諸眾生故。正迴向佛  
道。罪應如是懺。勸請隨喜福。迴向於菩提。迴向已禮諸佛。至心發願。願  
諸眾生等。悉發菩提心。繫心常思念。十方一切佛。復願諸眾生。永破諸煩  
惱。了了見佛性。猶如妙德等。發願已歸命禮諸佛。一切普誦誦已當梵梵  
已。懺悔已禮佛。恭敬自歸於佛。當願眾生。體解大道。發無上心。自歸於  
法。當願眾生。深入經藏。智慧如海。自歸於僧。當願眾生。統理大眾。和合  
無礙。願諸眾生。三業清淨。奉持尊教。和南佛法賢聖僧。次依時說偈  
竟。唱隨意。普禮法第三。恭敬呪願等悉如前。普禮十方三世諸佛。寂滅

道場上。盧舍那佛。普禮十方三世諸佛。普光法堂上。盧舍那佛。普禮十方三世諸佛。忉利天上。盧舍那佛。普禮十方三世諸佛。炎摩天上。盧舍那佛。普禮十方三世諸佛。兜率陀天上。盧舍那佛。普禮十方三世諸佛。他化自在天上。盧舍那佛。普禮十方三世諸佛。重會普光法堂上。盧舍那佛。普禮十方三世諸佛。祇洹林間。善財童子。盧舍那佛。普禮十方三世諸佛。七處八會。圓滿頓教。盧舍那佛。普禮十方三世諸佛。虛空不動戒藏。盧舍那佛。普禮十方三世諸佛。虛空不動定。盧舍那佛。普禮十方三世諸佛。虛空不動慧。盧舍那佛。普禮十方三世諸佛。歸佛得菩提。善心常不退。盧舍那佛。普禮十方三世諸佛。歸法。薩婆若。入大總持門。盧舍那佛。普禮十方三世諸佛。歸僧。息諍論。入大和合海。盧舍那佛。願諸衆生。三業清淨。奉持尊教。和南佛法。賢聖僧。請觀世音懺法第四。直錄其事。觀慧別出餘文。經云。三七日。七七日。悉應六齋。建首當嚴飾道場。香泥塗地。懸諸幡蓋。安佛像南向。觀世音像別東向。日別揚枝淨水。燒香散華。行者十人已還。當西向席地。地若卑濕。置低脚牀。當脫淨衣。左右出入。洗浴。竟着淨服。當日日盡力供養。若不能辨。初日不可無施安畢。各執香爐。一心一意。向彼西方。五體投地。使明了音聲者。唱云。一

心頂禮本師釋迦牟尼世尊。一心頂禮西方無量壽世尊。一心頂禮七佛世尊。一心頂禮十方一切諸佛世尊。一心頂禮消伏毒害陀羅尼。破惡業障陀羅尼。六字章句陀羅尼。一心頂禮十方一切尊法。一心頂禮觀世音菩薩摩訶薩。一心頂禮大勢至菩薩摩訶薩。一心頂禮十方一切諸菩薩摩訶薩。一心頂禮聲聞緣覺賢聖僧。禮竟燒香散華。而作是言。是諸眾等。各各胡跪。嚴持香華。如法供養。供養十方法界三寶。念想竟。口發誠言。願此香華雲徧滿十方界。供養一切佛。尊法諸菩薩。無量聲聞眾。以起光明臺。過於無邊界。無邊佛土中。受用作佛事。普熏諸眾。生皆發菩提心。供養訖。當向於西方結跏趺坐。繫念數息。令心不散。勿數風喘氣。為眾。生故。經十念。成十念已。次念十方佛。及七佛世尊。色身實相。妙身猶如虛空。又當慈念。念一切眾生。作此念時。如一上禪久運念已。安詳徐覺。一人裝香火。各各胡跪。召請。一心奉請。南無本師釋迦文佛。三編奉請。前所禮三寶。召請竟云。我今已具楊枝淨水。唯願大悲。哀憐攝受。三說。次三稱三寶名。觀世音名。次合掌說偈。願救我苦厄。去訖。偈後。四長行經文。次誦消伏毒害咒。說咒後。七行經文。或三編。或七編。次更稱三寶名。誦破惡業障陀羅尼咒。次更稱三寶名。誦六字章句咒。竟。

自以智力披陳懺悔。破梵行人。作十惡業。蕩除糞穢。還得清淨。次當發願懺願竟。一心作禮。禮上來所請三寶禮竟。如法行道。或三或七。旋竟。三自歸。自歸竟。令一人登高座。唱誦請觀音經。午前初夜。施上方法。餘時坐禪。禮佛依常法。是為一日一食規矩。至第二乃至第七七日。亦復如是。金光明懺法第五。直錄其事。觀慧別出餘文。莊嚴道場。別安唱經座。列幡華等。如上法安功德天座。在佛座左。道場若寬。更安大辨座。四天王座。在右。諸座各燒香散華。盡力營果菜。又別釘一盤雜果菜。擬散洒諸方。當日日洗浴。着新淨衣。經云。七日七夜。應用六齋。建首。初日午時。各執香爐。一人唱言。一切恭敬。一心頂禮。十方常住一切三寶。是諸眾等。各各胡跪。嚴持香華。如法供養。心默供養。訖口說是言。願此香華雲。徧滿十方界。如上方。作是說已。當召請。一心奉請。本師釋迦牟尼佛。一心奉請。東方阿閼佛。一心奉請。南方寶相佛。一心奉請。西方無量壽佛。一心奉請。北方微妙聲佛。一心奉請。寶華璫璫世尊。一心奉請。寶相佛。一心奉請。無垢熾寶光明王相佛。一心奉請。金炎光明佛。一心奉請。金百光明照藏佛。一心奉請。金山寶蓋佛。一心奉請。金華炎光相佛。一心奉請。大炬佛。一心奉請。寶相佛。一心奉請。金光明經中。及十方三

世一切諸佛。一心奉請大乘金光明海十二部經。一心奉請信相菩薩摩訶薩。一心奉請金光明菩薩摩訶薩。一心奉請金藏菩薩摩訶薩。一心奉請常悲菩薩摩訶薩。一心奉請法尚菩薩摩訶薩。一心奉請金光明經內及十方三世一切菩薩摩訶薩。一心奉請舍利弗一切聲聞緣覺賢聖僧。一心奉請大梵尊天。三十三天。護世四王。金剛密迹。散脂大辯功德訶梨帝南鬼子母等。五百徒黨。一切皆是大菩薩。亦請此處地分鬼神。三徧召請。復述心建懺之意。隨智力所陳。自在說道。竟三稱寶華璫瓏世尊。金光明經功德天。三稱竟。以雜盤食灑諸方。當說波利富婁那以去。至今我所求皆得吉祥。若竟唱一切恭敬還一一禮。上來所請三寶禮竟。三徧旋旋竟。三自歸。自歸竟。方供座食。此是午前方法。餘時如常。唯專唱誦金光明經也。方等懺法第六。略出五意。觀慧出餘文。經言。我去世後。此方等典。在閻浮提。猶如日月照明。世間衆生。遭思得見。四方言閻浮提者。無明域也。閻方等經。深識因果。如見日月。鑒覽四方。故知深經妙法。能示世間相。所謂示是道。是非道。即是間苦集道。即出世道滅。如是四法。皆由方等照了。分明經。又言。是方等經。無量勢力。能令一切人天。脩羅。地獄。餓鬼。悉至道場。如是章句。甚為希有。能滅一切大罪業。

報者。豈非示世間因果。所以者何。既舉五道。即是明苦。復云滅罪業。豈非是集。經又言。若能脩行。得全分寶。但能讀誦。得中分寶。華香供養。得下分寶。乃至二乘受記成佛。豈非示出世因果。解通四諦。事理分明。已如上說。行轉三障。今當說經云。若犯三自歸。乃至六重菩薩二十四戒。沙彌沙彌尼。比丘比丘尼等戒。能至心懺。若不還生。無有是處。當知方等能滅一切惡業罪障。必無疑也。又云。地域餓鬼。極惡報處。以經威力。聞即悟道。改醜陋形。又云。身有白癩。一心懺悔。若不除差。亦無是處。當知此經能轉一切重惡報障。金口誠言。決非虛也。若行此實法。初華聚觀世音來。次寶王釋迦佛來。乃至第七日。諸佛大衆皆來量根說法。發菩提心而不退轉者。當知此經能破煩惱障。明文在茲。孰當不信。是故行者。心寂滅相。行六波羅蜜。無所求中。吾故求之。佛實法。隨意往生妙樂世界。及諸佛前。破諸煩惱。出無明殼。長與苦別。具足聖道上。菩薩位。度脫一切衆生。廣爲三界而作父母者。若非方等。慈力莫由。譬如日月。欲除闇暝。生長萬物。此經亦爾。能滅非道。顯示正路。是大法王良藥。無價寶珠。豐樂國。若聞此經。如囚聞赦。如病得醫。如貧得寶。如行到家。歡喜踊踴。亦復如是。爲法故。尚不恡惜身之與命。况復其餘。若聞此經。當知不從小功德來。誰聞如是法。不發菩提。

心除彼不肖人癡暝無智者故云。辨若文殊於一切中教化一切令登補處。格其功德不及下分寶者。况上分耶。又一切聲聞辟支佛。十信補處如恒河沙。同入深禪思。惟功德不如一分。又四天下寶奉施如來。不如有人施持經者。一食充軀。何唯疑審。如是不七佛。即現證實不虛。三世如來。皆由此法。得成佛道。方便第一。行者既聞方等。有大勢力。令我增壽法。中生心。譬如死已還生。亦可爲母。豈不發心建勇猛意。傷已昏沈。無量劫來不脩。出要慙愧悔責。若犯嚴刑。一心慄慄如履冰谷。念此毒箭。要急當拔。煩惱重病。勤如救治。若能至心。則事無難者。念是事已。歸依十二夢王。求乞瑞夢。若不感者。徒行無益。倍加懇倒。殮啜無妄。隨見一王。即是聽許。見是事已。辦諸供具。既不能碎骨賣身。亦須破慳竭力。若先有道場。更應光淨。若其無者。當須營立。便利湯火。澡浴等處。皆令穩便。辦好華香。燈油果菜。不限廣狹。若不能日日初後。回無自力。不能當求外護。委以紀經。須新淨衣一通。無新浣。故依一明解。內外律師。發露受二十四戒。受呪預誦。使誦十佛十法王子。十二夢王名。憶持勿忘。棄捨一切色聲香味觸等。深生厭惡。知色如熱金。聲如毒鼓。香如惡風。味如沸蜜。觸如虺蛇。皆不可著。著則傷害。又斷莫一切世間緣務。生活人事。伎能作作。勿使經懷。盡其根。

源莫令惱亂。又捨貪瞋癡等。不善覺觀。無餘思念。求世福樂。唯志無上清淨菩提。心心相續。入善境界。方法第三前諸方便。弄引淳熟。渴仰顛顛。不惜身命。剋日定時。道場行法。初入之始。月有二日。道伴多少。十人已還。香泥泥地。散誕圓壇。采畫莊嚴。擬於淨土。燒香散華。懸五色蓋。及諸繒幡。請二十四軀象。設百味食。一日三時。洗浴著新衣。手執香爐。一心一意。散禮一拜。胡跪運念。念此香雲。徧覆十方。普雨一切寶。一切味衣服。卧具樓閣。殿堂。絃出法聲。上供諸聖。下施衆生。承佛神力。廣作佛事。利益一切。皆入佛道。與虛空法界等。作是念已。當奉請三寶。使聲聲運念。淚流于臉。如向死地。求於大力。一心奉請南無寶王佛。乃至十佛。具出經文。一心奉請南無摩訶祖持陀羅尼。方等父母。一心奉請十法王子。華聚雷音。一心奉請舍利弗等。一切聲聞緣覺。一心奉請梵釋十二夢王。凡三徧召請。次歎佛。世尊智慧如虛空。悉觀衆生去來相。十方一切悉見聞。我當稽首禮法王。次一一禮十佛。十王子等。竟。胡跪發露。披陳哀泣。雨淚首悔三寶。其實志誠。不諛不諂。不敢覆藏。隨行者。智力自在。說次發願。願共法界。怨親改革。洗浣熏修。清淨。次百二十帀。旋誦百二十徧呪。一帀一呪。聲不麤。不細。遲疾允當。旋誦訖。當禮十佛。十王子。更略披



陳發願。然後却坐思惟。觀一實相。觀法出餘文。思惟竟起整服。禮佛一拜。更旋百二十匝。誦百二十遍。呪。呪。旋訖。禮三寶。自陳罪咎。還坐思惟。如是作已。周而復始。唯第二日。略去召請餘事。終竟七日也。逆順心第四。夫四重五逆。佛海死尸。依小乘經。如斷多羅樹。畢竟不生。無懺悔。此依大乘經。聽許洗浣。如呪枯生果。如死者還生。雖有此法。要須至心。但理無逆順。事有違從。就惡論者。違於涅槃。順於生死。略為十一。無明醉惑。觸竟生著。二。內心既醉。外為惡友所迷。耽惑非法。惡心轉熾。三。內外緣具。自破已善。亦破他善。於諸善事。無隨喜心。四。既不修善。唯惡是從。縱恣三業。無惡不作。五。所造惡事。雖復未廣。而惡心徧布。欲奪一切樂。與一切苦。六。惡念相續。晝夜不斷。心純念惡。初無暫停。七。隱覆瑕疵。諱藏罪過。內懷奸詐。外現賢善。八。邪健保常。增上作罪。不畏惡道。九。魯扈。羈突。無慚愧心。了不羞耻。十。撥無因果。不信善惡。斷諸善法。作一闡提。如是十。心無明為本。增加添足。極至闡提。順入生死。從闡入闡。織作結業。無解脫期。是為生死違順也。既識無明始終。今欲懺悔。修善改惡。須違生死。順於涅槃。運十種心。以為對治。一。正信因果。為善得善。為惡得惡。雖無現行華報。當來果報不失。雖念念滅。而善惡之業。終不敗。二。信為功德之母。信為入道初門。順於涅槃。

翻破不信闡提心也。二當慙愧我此罪不預人流。慙愧我此罪不蒙天護。慙愧悔過是為白法。亦是三乘行。出世白法是為慙愧。翻破無慙黑法也。三怖畏無常命如山水。亦如假借一息不還。隨業流轉。冥冥獨往。誰訪是非。唯憑福善。險資糧。當競泡沫。食息無暇。是為觀於無常。翻破保常。不畏惡道。四發露懺悔罪。即消滅。如露樹根。枝葉彫悴。是為發露。翻覆歲五。斷相續心。畢竟捨惡果。決雄猛。猶若剛刀。是為決定。翻破相續六法。菩提心。普與一切樂。願救一切苦。橫豎周徧。翻破徧惡心也。七脩功補過。勤策三業。精進不休。是為修功。翻破三業。無事作惡也。八守護正法。不令外道惡魔毀壞佛法。誓欲光顯。是為守護。翻破滅一切善事。九念十方佛。無量功德。神通智慧。願加護我。是為念佛。翻破念惡友心。十者觀罪性空。罪從心生。心若可得罪。不可無。我心自空。罪云何有。罪福無主。非內非外。亦無中間。不常自有。但有名字。名字之心。名為罪福。名字即空。還源反本。畢竟清淨。是為觀罪性空。翻破無明顛倒。執著無明滅故。諸行滅。故生死滅。十二因緣大樹壞。亦名出世因果分明。得見四方。此之謂也。表法第五。行者既識十心逆順。以正觀心。歷眾事一一緣中。皆表勝法。心心相續。觀道無間。入不二門。言方等呪者。觀實相。理不可說。而無不說。赴四

機緣作四方法說。於實相故名爲方。雖作是說。說即無說。無說即空空。故不見。說與不說。無邊無中。名之爲等。又復逗機。有說說於此。呪呪於三障。能呪之法。既不可說。所呪之罪。亦不可說。無罪故無死生。無呪故無涅槃。畢竟清淨。故名方等呪也。香泥塗地。采畫莊嚴者。地表法性。香表福德。畫表智慧。福慧二種莊嚴法身也。五色蓋者。表於五陰。不即佛性。不離佛性。起無緣慈。普覆一切也。二十四形像者。表十二因緣。逆順觀也。凡二十四支。順觀。十二覺。三佛性。逆觀。十二覺。三佛性。所謂無明愛取。是了因。佛性行。有是緣。因佛性。識名色等。是正因。佛性覺。二十四支。即二十四佛也。百味食者。表一切法中。皆有中道法。喜禪悅味也。一日三時洗浴者。即表緣一實修。三昧遣蕩。無明塵沙。見思垢膩。顯淨法身也。著新衣者。表寂滅。忍覆二邊。醜陋也。遶百二十巾者。即表十二因緣。凡十種觀。有百二十支。東而言之。但是三道。愛取是煩惱。道行。有是業。道識名色等。是苦道。循還三道。常爲觀境。故遶百二十巾也。一呪對破一支。即破三道。三道破。即是三障。破經云。發菩提心。而得不退。即證破煩惱障也。若犯諸戒。若不還生。無有是處。證破業障。白癩除差。即證破報障也。觀誦呪聲。聲不可得。如空谷響。無我觀。遶旋足足。不可得。如雲如影。不來不去。若坐思惟。思惟一念。

之心。不從意根生。非外塵合生。非離生。又非前念生。故生亦非前念滅。故生亦非前念生。滅。合共生。亦非前念非生。非滅生。又非生生。亦非不生。生亦非生。不生共生。亦非不生不生。畢竟無一念不知從何生。但有生名字。名字非內外。中間名無名。故觀心既爾。從心所生一切諸法。亦復如是。觀一切法。悉與修多羅。合如是觀時。何者是我。我作何事。何者是罪。何者是福。以觀力故。豁然開悟。空慧明徹。如水性冷。飲者乃知。唯獨明了。餘人。不見所得智慧禪定功德。皆不可說。如此悟時。自識遮障。不俟分別。若未階此位。止獲事功德者。應當護口。勿向人言。若陳說者。得障道罪。青盲。瞎。瞎。白癩。頑癡。又復行者。本誓七日。中途懈怠。亦得障道罪。何以故。欺本心。欺諸佛。欺一切衆生。深須慎之。其間諸相。不能自了。當向方等師。面決也。

訓知事第七。吾少嬰勤苦。備歷艱關。遊學荆揚。雍預。唯著一衲。三十餘年。冬夏不釋體。上至天子。下至士民。雖有所施。受而不私。一果一縷。入衆已後。尚不希念。况故侵之。所以然者。衆寶尊重。若能增益。名甘露苑。若有減損。即蒺藜園。自飽自傷。因到因起。可以意得。何俟多言。夫人發心。隨有所作。爲讀誦。聽學。講說。經行。懺悔。供養。捨力。未有首尾。慎莫中止。中止者。違本心。若再有所作。至前止處。留難。即起修業。不成。今生現障。後彌。

障道此行人大忌。應須竭力善始。令終業既坦然。報亦圓滿。此亦可意得。昔有一寺師徒數百。晝夜禪講。時不虛棄。有淨人竊聽說法。聞已用心。每揚簸洮汰。繫念存習。謂以淨心揚簸不善。以禪淨水洮汰不淨。隨有所作。念念用心。一時執爨觀火燒薪。念念就盡。無常遷逝。復速於是。躄踞竈前。寂然入定。火滅湯冷。維那懼廢眾粥。以白上座。上座云。此是勝事。眾宜忍之。慎勿驚觸。聽其自起。數日方覺。往上座所具陳所證。叙法轉深。上座止曰。爾向所言。皆我境界。而今所說。非我所知。勿復言也。因而顧問。頗知宿命。不答云。薄知。又問何罪為賤。何福易悟。答云。此賤身者。前世之時。乃是今日徒眾老者之師。亦是少者之祖師。徒眾所學。皆昔所訓。爾時多有私客。恒制約不敢侵眾。忽有急客。輒取少菜。忘不倍備。由此譴責。今為眾奴。前集未久。薄修易悟。宿命罪福。其事如一。眾聞此悲。不能勝。鑑鏡若斯。豈可不慎。同學照禪師於南岳眾中。苦行禪定。最為第一。輒用眾一撮鹽作齋飲。所侵無幾。不以為事。後行方等。忽見相起。計三年增長。至數十斛。急令陪備。仍賣衣資買鹽償眾。此事方久。亦非傳聞。宜以為規。莫令後悔。吾雖寡德行。遠近頗相追尋。而隔剡嶺。難為徒步。老病出入。多以眾驢迎送。此是吾客私計功。疇直令彼此無咎。吾是眾主驢。亦我得。既捨入眾。

非復我有我不合用。非我何言。舉此一條。餘事皆爾。陳宣帝敕留不許入天台八。京師三歲。雖弘皆一途。偏顯兼之者寡。朕聞瓦官濟濟。深用慰懷。宜停訓物。豈違獨善。一二曹義達。口具得朕意也。四月一日。臣景歷。太建九年。宣帝敕施物目九。智顛禪師。佛法雄傑。時匠所宗。訓兼道俗。國之望也。宜割始豐縣。調以充衆費。蠲兩戶民。用供薪水。主者施行。二月六日。臣景歷。太建十年。宣帝敕給寺名十。具左。僕射徐陵。啓智顛禪師。創立天台。宴坐名嶽。宜號修禪寺也。五月一日。臣景歷。至德三年。少主敕迎十一。春寒猶厲。道體何如。宴坐經行。無乃為弊。都下法事。恒興希相助。弘闡今遣。宣傳左右。趙君卿。迎接。遲能即出也。正月十一日。臣徵神筆一二。君卿口具便望。相見在促。少主第二敕。得使人趙君卿。啓并省來答表。志存林野。兼有疾病。願停山寺。不欲出都。不具。一二巖壑高深。乃幽人之節。佛法示現。未必如此。且京師甚有醫藥。在疾彌是所宜。故遣前主書朱宙。迎接。想便相隨。出都。唯遲法流不滯。會言在近。二月八日。臣徵神筆朱宙。口述一二。少主第三敕。前雖遣兩使。殊未委悉。意存三寶。故有相迎。今復遣龍宮寺道昇。並令面陳一二也。二月二十八日。臣徵。少主敕東陽州刺史永陽王。聞王在州。迎顛禪師。大弘法事。甚會朕

心今迎出都。王宜敦諭申朕意也。正月十日臣徵路次迎陵。敕書迎候。近得永陽王啓知禪師遂能屈德隨朕使出都。甚有欣遲。當稍次近路。涉險道殊足爲勞。今遣敕左右黃吉寶迎候。但未知欲安止何寺。想示使人仍令前還。即勒所由料理房舍也。遲近會言此未委悉。三月二十四日臣徵至開陽門舍人陳建宗宣口敕。十二禪師舟渚日久。固勞道德。今遣主書陳建宗賁輿往。必希上至敬寺。三月二十六日。在至敬宣口敕。仰延略成勞動。但禪靜必依空閑。今葺靈耀寺。權充宴坐。敕主書羅闡相送。四月。在靈曜寺宣口敕。護國之力莫過敷演。仰屈於太極殿開大智度論題。還寺就講。今遣舍人施文慶往論相開法施也。在靈曜寺主書羅闡宣口敕。送真金像一軀。光趺五十。釋論一部。闕寶縷胎案一面。山羊鬣塵尾一柄。并匣。虎面香爐一面。并合。東田口二羅闡又宣口敕。不許讓口。且留山中使役。勿勞輸送。羅闡宣口敕。送扶月供夏服一通。細蕉五端。絹布各十疋。綿十斤。黃屑二斗。扶月白米五石。錢三千文。果菜付隨。由扶月送學士三人。弟子三十人。各給夏服扶月。供依舊式。羅闡宣口敕。不許讓扶月供。扶月薄少。無所致讓。受已捨施。彌會功德之心。羅闡宣口敕。不許讓。襯衣物。

法施無盡財物有竭所送不多。忘懷納受。九月二十四日羅闡宣口敕施檳榔二千子。薊子一百枚。菲席一領。羅闡宣口敕請講。國家一年舊有仁王兩集。仰屈於太極殿。開講法式。處分一聽。指搗。今遣主書羅闡取意。口敕於光宅寺講仁王經。今欲於寺捨身僧得大施。敬屈講仁王經。日自欲聽聞。今遣後閣舍人李善慶往。通知一二口。敕治光宅寺。光宅是梁武龍潛之地。不整處多。今敕善量。隨由就功。一二羅闡取來意。少主后沈手書。十二妙覺和南。今遣內師許大梵往。稽首乞傳香火。願賜菩薩名。庶積熏修。菩提眷屬。謹和南答。令名海慧菩薩。沈后扶月供。熏陸沉檀各十斤。黃屑一斗。細紙五百張。燭十捷。赤松間米五石。錢一千文。右件月月供光宅寺。三月十二日。少主皇太子請戒。十四淵和南。仰惟化道無方。隨機濟物。衛護國土。級引天人。昭燭光輝。託迹朋友。比丘入夢。符契之像。久彰和上來儀。高座之德。斯炳是以翹心七淨。偈仰四依。庶三自之歸。可弘五戒之法。永固竊尋。內外兩教。大小二乘。重道尊師。由來尚矣。伏希俯從所請。世世結緣。遂其本願。日日增長。今月十五日。於崇正殿。設千僧法會。奉請為菩薩戒師。謹遣主書劉璿略申誠款。殊未宣悉。弟子淵和南。正月十三日。皇太子扶月供。熏



陸香一合。檀香三十斤。中藤紙一幢。乳酥一斗。錢二千文。右牒月月供光宅寺。陳永陽王手書。十六秋氣淒冷。願安樂行耳。弟子寡末。未能治道。願欲延屈。方憑開導。今遣左右陳文強往。悉其一二。弟子陳伯智和南。八月十日。王第二書。弟子少奉。正真長。而彌篤州中事。隙時得用心。但至止以來。實有欽睭。前書要師出鎮。講說未辱。還告良以鬱陶。佇聽之情。不忘瞬息。重遣今信。必望翻然。學徒多少。並希攜帶。故前有白尋勒人船所遲來。儀會言在促。弟子陳伯智和南。王第三書。使人山返。仰具高懷。域誠不果。更深為恨。本知山水得性。為物忘懷。復須安忍。今遣迎接。佇望光臨。弟子陳伯智和南。高麗昆布人參等。遠云是物。陋返。不。王解講疏。菩薩戒。弟子陳靜智。稽首和南。十方常住。三寶幽顯。冥空現前。凡聖伏惟。法王法力。憫三界之顛愚。無漏無為。開一乘之奧典。深宗絕稱。仰蓮華以立名。實智難思。借寶珠而諭理。殷勤弘接。始則大事。因緣指掌。言提終令。小乘解悟。接須彌擲世界。未是為難。開秘密導蒼生。斯為勿易。天台顛闍梨遊浪法門。貫通禪苑。有為之結已離。無生之忍現前。仰屈來儀。闡揚極教。高軒層殿。廣闢齊宮。聖眾雲集。仙群霧委。俱奉傳燈之曜。共挹懸河之流。法侶忻慶。神祇踴躍。弟子飄蕩業風。沉淪愛水。雖餐

法喜弗祛蒙蔽之心徒仰禪悅終懷散動之慮但日輸馳騫曦和之轡不  
留月鏡迴軒恒娥之影難駐適啓金函便收寶軸法輪輟軫驚嶺之說何  
期清楚停音魚山之唱方息有離有會歎息奚言愛法敬法潺湲無已謹  
於今月十三日解講功德仰設法會并度人出家又觀音菩薩法身大士  
拯危拔難利益人天奉造靈儀即日鎔鑄用斯福善上資清廟聖靈又奉  
爲即日至尊願御膳勝常安德宮太后菩薩寢興納豫皇太子起居萬  
福諸王諸主咸保嘉慶未及弟子自身并息謀等內外眷屬一切因緣壽  
命長遠身心快樂唯願顯揚三寶通達五乘戒與秋月俱明禪與春池共  
潔生生世世與閻梨及講衆黑白見聞覺知恒結善友恒將濟度還同智  
積奉智勝如來便似藥王觀雷音種覺或見生安樂世界或處兜率天宮  
俱蕩三乘行俱向一乘道恒沙菩薩爲等侶恒沙國土爲佛事得法自在  
得心自在同修七覺分同趣三菩提虛空有邊此願無盡仰希幽顯證明  
法界怨親同入願海迴  
向薩雲若爲無所得故

# 永樂大典卷之一萬九千七百三十七

# 永樂大典卷之一萬九千七百三十八

一屋

## 錄

沙門灌頂國清百錄二

沙門灌頂國清百錄王屬真觀惠裴二法師裴是梁湘東王蕭釋門師觀  
是湘江左右名望最重十七 靜惠和南更雪寒重願禮懺不迺仰疲弟  
子眩恍無理真觀法師願得入山攝慮禪寂今以彼書仰呈裴公又正東  
裝待小晴通便當就路但觀公非唯義解又誦法華既朗慧燈方澄定水  
仰惟闍梨德侔安遠道邁光猷遐邇傾心振錫雲聚紹像法於將墜以救  
昏蒙顯慧日之餘光用拯澆俗兼孔山陰舍良田以供耕墾姚寶安捨淨  
財以給菹菜禪堂行就修緝糧廩不慮闕無諸善因緣亦各隨喜弟子力  
薄竭誠供養願勿以資待繼意徒衆爲憂憑茲福業庶遣煩勞藉此熏修  
冀荷冥祐弟子陳靜惠和南 王送經像入天台 金銅坐像一軀涅槃  
經一部 燭一百捷 大幡二十張 絹一百疋 淨人白石 淨人阿  
甘 右牒沈儀同請疏 儀同公菩薩戒弟子吳興沈君理和南竊聞大  
乘者大士之所乘也高廣普運直至道場復作四依周旋六道仰惟德厚

深會經文於五誓之初請開法華題一夏內仍就剖釋道俗咸瞻延佇嘉  
唱慈悲利益不違本誓耳謹和南 陳左僕射徐陵書最多門人競將去  
追尋止得三紙 陵和南昨預沈儀同法席餐奉甘露無畏之吼衆咸歸  
伏然正法炬朗諸未悟自慶餘年得逢妙說尋事諮展此不申心謹和南  
陵和南注仰之心難可數具拔公至蒙三月二十日肯用慰積歲傾心  
麥冷體中何如願一日康勝山中春夏無餘障惱耳遲復存肯弟子二三  
年來溘然老至眼耳聾闇心氣昏塞故非復在人兼去歲弟六兒夭喪痛  
苦成疾由未除愈適今月中又有哀故頻歲如此窮慮轉深自念餘生無  
復能幾無由禮接係仰何言敬重瑛公金還白書不次弟子徐陵和南  
陵和南放生星聞公家極相隨喜事是拔公口具謹不多誌唯遲拔公廷  
出數百里水全其命根如此功德筭數無盡隨喜無量此不妄謬弟子徐  
陵和南 陳徐陵五願上智者禪師 陵和南弟子思出樊籠無由羽化  
既善微弱冀願力莊嚴 一願臨終正念成就 二願不更地獄三途  
三願即還人中不高不下處託生 四願童真出家如法奉戒 五願不  
墮流俗之僧憑此誓心以策西暮今書丹款仰乞證明陵和南陳吏部尚  
書毛喜書 累年仰系不易可言承今夏在石像行道欣羨無極又聞欲

於天台營道場。當在夏竟耳。學徒遠近歸依者。理應轉多。安心林野。法喜自娛。禪講不輒耳。四十二字門令。附雖留多時。讀竟不解。無因諮訪。為恨轉積。南嶽亦時有信。照禪師在嶽嶺。徒眾不異大師。在時善公於山講釋論。彼亦色遲望。還網維大法。不者歸鍾嶺。攝山亦是棲心之處。何必適遠方。詣道場。希勿忘京師邊地之人。豈知迴向傾心。無時不積。未因接顏色。東望歎滿敬德信人。今返白書。不具弟子毛喜和南弟子諸弟及兒等。悉蒙平安。第三任鄱陽郡。第二為豫章王司馬。第四大延卿。第五入閭任度支郎。大兒由在東宮為中書舍人。仰蒙垂顧。以大善知識。大同學。輒復遠諮。喜次書秋色尚熱。道體何如。禪禮無乃損德。弟子老病相仍。湯藥無效。兼不得自閑。轉有困爾。仰承移往佛隴。永恐不復接顏色。悲慨但深。仰惟本以曠濟為業。獨守空巖。更恐違菩薩普被之旨。近與徐丹陽諸善知識。共詳量等。是一山鐘嶺天台。亦何分別。必希善加三思。不滯於彼我京師。彌可言師一二。因拔師口具其間。願敬道德。弟子毛喜和南喜次書。適奉南嶽信。山眾平安。弟子有答。具述甲乙。後信來。當有音外也。今奉寄牋香二片。熏陸香二斤。檳榔三百子。不能得多。示表心勿責也。弟子毛喜和南喜。又書慶講。今者仰餐敷說。訓往綽然。道俗嗟味。般若照。

明。豈是拙辭所能稱述。弟子毛喜和南。天台山脩禪寺智顛禪師放生  
碑并序。二十二陳通直散騎常侍國子祭酒東海徐孝克撰。夫太易無體  
品類所以咸亨。太一無名。至人於是設教。仰觀俯法。遠取旁求。兼三以才  
吹萬維物。建官台鉉。則五嶽作鎮。辨方伯牧。故四瀆分流。闕伊闕覽八紘。  
鑿龍門陂九澤。播厥習險。因之以利民。相生卜洛。樹之以君長。坎之時用  
大矣哉。我皇帝作聖凝神。乘圖御籙。無為無欲。道契汾陽。垂拱垂衣。德隆  
至治。辰象貞明。管灰合序。方外無虞。海內有原缺被風雅於華戎。盛雍熙於  
曩代。巍巍乎難得而稱者也。至如光啓法式。榮敷道樹。化彰十善。弘濟四  
生。天台脩禪寺智顛禪師。疏練自居。苦節行矣。奉揚皇風。總持像季。禪  
師俗姓陳氏。潁川人也。乃有媯之後焉。四友驚座。逃聽多美。六奇列爵。世  
載其賢。祖詮早世。父起祖。梁使持節散騎常侍益陽縣開國侯禪師童  
真出家。聰敏易悟。寓居荆峽。遊化幽并。自北徂南。兼行禪智。禹穴將探。台  
山是卜。白雞路出。青髓巖開。攀桂結宇。蕭然甜止。林交五柳。既馥旃檀之  
氛。塔現三層。終縣水精之色。雲崖天樂。不鼓自鳴。石室金容。無形留影。秀  
嶺巖岑。浪波浩瀚。洪濤蜃氣。冒遠苞空。巨壑喬松。干雲翳日。翔集飛走。叢  
育珍怪。地中藏玉。觀曲枝而易辨。淵內沉珠。見負流而可別。神通開士。如

意柔門。振錫呪泉。騰空舞鉢。受丹仙容。况急水而時來。避官真人乘迴風。而迥至。厥土宏灑。靈識斯在。禪師福慧基。磁聲光利益。宣猛將軍臨海內。史計尚兒。子勲之。曾世顯方術。賣藥登仙。聞于昔漢。剖符作守。即此明時。請轉法輪。講金光明經一部。前雲騎將軍。臨海內史。陳思展。及其猶子。陳要卿等。即土人也。戎章衣繡。優秩家邦。奉屈禪師。次講法華經典。白牙團扇。初開律藏之門。玉柄塵尾。傍闡經王之偈。繫珠始訓。親友醉除夢鼓。將鳴梵魔疑遣。因迺雙明誠勸。廣辯殃福。尚兒仍獎論滄主。嚴續祖羊公。賀等群賢。凡百君子。信誓斯立。丹誠恪勤。白業諧辯。嗟如棠之往累。歎鉤僕之來緣。各捨滄業。及魚梁等。合六十三所。二緣樹下。縣唱善哉。五旬座上。遙聞禪指。巨海無際。一時清謐。衆生無邊。同荷安快。掌擎世界。未學難思。手把虛空。非名希有。桂陽王殿下。皇枝之貴。應懋間平。情崇孔釋。吐懸河之旨。擊節證明。示半月之形。深心隨喜。五侯三傑。曾不間然。黃髮青衿。咸同踊躍。藏諸篆素。青編落簡。樹以貞碑。聲芳靡絕。假令山止海運。惠施之美。猶傳龜吉。筮凶。鐫勒之功。無毀孝克。才慙十倍。學愼三餘。秋蒐春捕。久捐染截。書紳畫地。曾何圖寫。雖復張池並黑。寧擬妙辭。岷石徒刊。非能墮淚。仰熏心之上善。羨山水之清音。寸志片言。乃爲銘曰。設位觀像。



剖極開潭。蕩蕩爲大。蒼蒼以尊。膏川淚瀆。地脉何源。導疏咨禹。蓋取維軒。  
嗟乎坎德。至矣坤元。淳風樂土。君臨御寓。明明孝治。穆穆聖主。道冠當今。  
功高前古。慶協嘉瑞。美均擊拊。仁沾動植。澤及遐宇。釋種高族。身資瓢菽。  
匪慕分圭。歸心染服。辭彼緣慮。言旋幽谷。志託松筠。形隨喬木。七覺善誘。  
五禪清肅。無遠弗屆。無思不服。將軍邦宰。肩印銷罪。淑女良夫。民業珍賄。  
靡庖十明。寧追百倍。不見所欲。忘懷無待。各捨貨泉。同成佛海。決濟冥蒙。  
瞻眺唯空。屏師送雨。列子揚風。鯤鱗以北。極外之東。遠水銜日。曾波駕蓬。  
地上之比。山下之蒙。涇清渭濁。朝宗會同。天台維節。林泉搔屑。頂列三晨。  
峯危九折。瀑布高瀉。神狀姝潔。響若奔雷。皎如素雪。時隆冬而不凝。歲炎  
早而無竭。石橋杳邈。晨暉映徹。仰止青霄。俯臨丹穴。鳥路雲通。人途徑絕。  
渤澥難邊。含情泝沿。嗷嗷岌岌。萬萬千千。鼓鯁掉尾。相望自然。薜網無挂。  
任鈎不牽。歌舫靜拽。響俎停羶。行滿業大。弘生爲最。斷樹誠規。翳樊斯誠。  
噲叅靈鶴。敬康神蔡。隨感明珠。于期軒蓋。嘉會信徵。潛騰是賴。逝矣虞淵。  
波瀾易遷。高岸深谷。蓬海桑田。石餘幾拂。芥盡何年。大地將隕。須彌洞然。  
風傾金際。火及初禪。猗歟水性。報轉常圓。隋高祖文皇帝敕。二十一皇  
帝敬問光宅寺智顛禪師。朕於佛教。敬信情重。往者周文之時。毀壞佛法。



發心立願必許護持。及受命於天。仍即興復。仰憑神力。法輪重轉。十方衆生。俱獲利益。比以有陳。官亂。殘暴東南。百姓勞役。不勝其苦。故命將出師。爲民除害。吳越之地。今得廓清。道俗又安。深稱朕意。朕尊崇正法。救濟蒼生。欲令福田永存。津梁無極。師既已離世網。修已化人。必希獎進。僧伍固守禁戒。使見者欽服。聞即生善。方副大道之心。是爲出家之業。若身從道服。心染俗塵。非直含生之類。無所歸依。抑恐妙法之門。更來謗讟。宜相勸勵。以同朕心。春日漸暄。道體如宜也。開皇十年正月十六日。內史令安平公臣李德林。宣內史侍郎武安子臣李元操。奉內史舍人裴矩行。秦孝王書。二十三。冬暮寒切。道體何如。法務勤辛。有以勞念。安州方等寺奉爲皇帝修立。屈法師向彼行道。甚不可言。已令所司發遣供給。願以熏修爲懷。不憚利涉也。道深敬德。遣白不具。弟子揚俊和南。十二月十七日。秦孝王次書。二十三。傾仰每深甚熱。禪師道體何如。修習不乃勞心也。夫由有展企。結良深。願珍德。遣白不具。弟子揚俊和南。五月十九日。奉施沉香等如別。至願檢領。沉香十斤。牋香十斤。熏陸少許。右牒薄申供養。晉王初修書。二十四。金風御節。玉露調時。道體体和。安樂行不。法師抗志名山。棲心慧定。法門靜悅。戒行熏修。籍甚徽猷。久承音德。欽

風已積。味道爲勞。冀託舟航。用披雲霧。故遣使人。往彼延屈。希能輕舉。以沃虛金。佇望來儀。不乖眷意也。弟子楊廣和南。王治禪衆寺書。二十五  
深具謙挹之旨。但高人遊處。觸地是安。然法宇僧坊。須盡嚴正。經云。四事供養。一不可虧。已勒有司。修葺願忘。懷受施也。弟子楊廣和南。王受菩薩戒疏。二十六  
使持節上柱國太尉公揚州總管諸軍事揚州刺史。晉王弟子楊廣稽首。奉請十方三世諸佛。本師釋迦如來。當降此土。補處彌勒。一切尊經。無量法寶。初心以上。金剛以降。諸尊大權。摩訶薩埵。辟支緣覺。獨脫明悟。二十七賢聖。他心道眼。乃至三有最頂。十八梵王。六欲天子。帝釋天主。四天大王。天仙龍神。飛騰隱顯。任持世界。作大利益。守塔衛法。防身護命。護淨戒無量善神。咸願一念之頃。承佛神力。俱會道場。證明弟子誓願。攝受弟子功德。竊以識暗萌興。即如來性。無明俯墜。本有未彰。理數斯歸。物極則反。欲顯當果。必積于因。是調御世雄。備歷生死。草木爲籌。不可勝計。恒沙集起。固難思議。深染塵勞。方能厭離。法王啓運。本化菩薩。譬如日出。先照高山。隨逗報宜。權爲方便。如彼衆流。咸宗大海。弟子基承。積善生在。皇家庭訓。早趨貽教。夙漸福理。攸鍾妙機。須悟耻崎。嶮於小選。希優遊於大乘。咲止息於化城。誓舟航於彼岸。但開士萬行。戒善爲先。菩

薩十受專持最上。諭造宮室必因基趾。徒架虛空終不成立。佛揆庸抑。又聞之孔老釋門。咸資鎔鑄。不有軌儀。孰將安仰。誠復釋迦能仁本爲和尚。文殊師利冥作闍梨。而必籍人師顯傳。聖授自近之遠感而遂通。薩陀波唵磬髓於無竭。善財童子忘身於法界。經有明文。敢爲臆說。深信佛語。聿遵明導。天台智顛禪師。佛法龍象。童真出家。戒珠因淨。年將耳順。定水淵澄。因靜發慧。安無礙辯。先物後己。謙挹盛風。名稱普聞。衆所知識。弟子所以虔誠遙注。命撤遠延。每畏緣差。值諸留難。亦既至止。心路豁然。及披雲霧。卽銷煩惱。謹以今開皇十一年十一月二十三日。總管金城設十僧蔬飯。敬屈禪師授菩薩戒。戒名爲孝。亦名制止。方便智度。歸親奉極。以此勝福奉資至尊皇后。作大莊嚴。同如來慈。普諸佛愛。等視四生。猶如一子。弟子卽日種羅睺業。生生世世還生佛家。如日月燈明之八王子。如大通智勝十六沙彌眷屬。因緣法成。等侶俱出。有流到無爲地。平均六度。恬和四等。衆生無盡。度脫不窮。結僧那於始心。終大悲以赴難。博遠如法界。究竟若虛空。具足成就。皆滿願海。揚廣和南。王觀戒師衣物等。聖種納袈裟一緣。黃紋舍勒一腰。綿三十屯。鬱泥南布袈裟一緣。黃緣布襪一具。絹四十疋。鬱泥緣布偏但一領。黃紬卧褥一領。布三

十禪。鬱泥絲布坐褥一具。烏紗蚊幃一張。紙二百張。鬱泥絲布  
方裙一腰。紫紵靴一量。錢五十貫。鬱泥雲龍綾被一緣。龍鬚席  
一領。蠟燭十挺。鬱泥羅頭帽一領。須彌氈一領。銅硯一面。高  
麗青坐布一具。鳥皮履一量。墨二挺。黃絲布背襦一領。南榴枕  
一枚。和香一合。鐵錫杖一柄。見在象牙管一管。麈尾一柄。烏  
油鐵鉢一口。并袋斑竹筆二管。銅匙筋一具。犀角如意一柄。并匣  
白檀曲几一枚。銅重盃三口。鑰石香爐奩一具。山水繩牀一張。  
銅搔勞一口。銅香火匙筋一具。白檀支頰一枚。銅澡灌一口。  
楠榴夾膝一枚。挑竹蠅拂一柄。鐵剪刀一口。蒲移文木案并褥。  
犀裝瓜刀一口。鐵剃刀一口。黃絲布隱囊一枚。紫檀中箱一具。  
鐵鑷子一具。白瓦唾壺一口。并籠中心筆格一枚。銅燭擎一具。  
鍤石裝枓心經格一具。犀裝書刀一口。白團扇一柄。師嚴教尊。右  
四字瓜喜捨供養。右四字龍習惱餘氣。右四字懸針緣覺侵斷。右  
四字垂露咸登常樂。右四字飛白豈如菩薩。右四字倒薤能施所  
受。右四字魚聲聞是證。右四字科斗戒定慧滿。右四字多苦集滅  
道。右四字大篆穀皮屏風一具。瓜篆龍魚科斗飛白垂露倒薤等書淨

道。右四字大篆。穀皮屏風一具。八篆龍魚科斗飛白垂露倒薤等書淨。

人善心年十一。右牒開皇十一年十一月二十三日。王稟戒名總持菩薩書疏二十七。即用法諱弟子總持和南。柳顧言還奉旨垂示六種捨施。及留受用弟子一日恭觀猶以陋薄。不稱宿心。來旨既以轉施功德。彌爲增上。悲敬福田。深是平等。固非所能周見。事事仰依其所留者。既以不多。留受用旨遣報諮謹和南。王書二十八。弟子總持和南履長戒辰在俗成慶。伏惟吐納禪慧。與時休和。弟子稟受以來。粗堪靜攝。謹遣參承。謹和南。王請留書二十九。弟子總持和南爰逮來誨。須往荆楚辭致首尾。仰具高懷。但祇稟淨戒事成。甫爾宿昔凝滯。匪遑諮決。閣梨和尚。經稱勝田種子。雖投嘉苗。未植方用。心形永伸。供養庶憑。善誘日灑。塵勞凡厥。共緣依止。有地斯亦。舟航兼運。利益弘多。如來化導。何必止還。天竺菩薩。應變本無定方。深願坦然。以虛受物。遲延展禮。面當諮遜。謹和南。開府柳顧言宣口教云。智者爲當長去。更有還期。弟子意不欲相去。遼遠脫能。旋迴不敢。留停鎮下。近山隨樂。住止。又欲奉留。待二月十八日。同度延陵鎮。仍共至棲霞。履行於彼。送別。王重留書三十。弟子總持和南。逮旨須取明二日。垂別。修復未周。便深傾欵。弟子前昨晝夜。熟更惟忖。智者至止。以來。未經一夏。兼荆潭路遠。安居將促。江波浩蕩。行程難期。既

卷之三

六

去此處。又不至前所。半途結夏。投止亦難。又按經律。一夏供養。安居僧福田無量。况乎師道。及大眾力。凡夫淺薄。本資勝緣。菩薩大慈。須受應供。暮春行謝。首夏向臻。九旬忽違。四事虛弃。修心與理。於情匪安。今欲仰留度夏。發遣冀不半途飄露。脫疑邑下喧湫。須依林壑。安居攝山。亦當為便。若法歲將滿。預勒蔣州裝船。南出石頭。西浮彌易。既乘爽節。因得順風。去留之宜。事理咸會。此間彼處。仰聽擇一意。不可盡辭。豈多宣謹。和南三月一日。王許行書。弟子總持和南。復逮今旨。欲遂前心。功德因緣。豈敢違忤。謹遵宿願。即命所司發遣。發日離晨。仰聽詳擇。庶解夏非遠。秋水乘流。賜答來期。必當無爽。用茲歡喜。以蠲悲敬。謹和南。蔣州僧論毀寺書。奉誠寺慧文龍光寺法令光宅寺智勝寺稽首和南。伏見使人賞符壞諸空寺。若如即目所覩。全之與破。及有僧無僧。毀除不少。伏惟大王菩薩植信。崇明興建三尊。慈仁化物。豈不弘護佛法。留心塔寺。但此處僧徒忽見毀廢。咸懷憂恐。大王雖照同朝日。而聖道高遠。衆情傾仰。無因簡徹。伏惟智者禪師。道俗歸止。有所言勸。悉善為先。文等不揆庸微。馳來奉告。必願運大慈悲。垂為申達。冀未壞之寺。庶得安全。敢藉護持。輒此祈仰。謹和南。開皇十二年二月八日。述毀寺書。今獲蔣州奉誠寺慧文律師書敬。

呈如別。仰惟匡持三寶。行菩薩慈。近年寇賊交橫。寺塔燒燼。仰乘大力。建立將危。遂使佛法安全。道俗蒙賴。收拾經像。處處流通。誦德盈衢。銜恩滿路。昔居戎在陳。尚得存心。况息武興文。方應光顯。至如慧文所述。擄剔伽藍。必由在所。官人多生僻解。致令外僧惶惑。憂懼不寧。貧道常念無堪。謬當知識。若論愛惜形命。豈敢言忤公門。特是佛法相開。亦由香火事大意之所為。唯憂冥道。寧忘即日之身。必存未來之義。若不述愚心。則虛當四事。復乖三稔香火。是何人乎。是何人乎。在所官司。唯怖事辦。豈慮因果。將來善惡耶。當願聖德尊嚴。履萬安之路。福祿隆重。高而不危。修菩薩行。棟梁佛法。牆塹三寶。澤覃四海。風芳萬代。若謂寺多州少。國或不聽。方便善權。仰由安立。若須營造。治葺城隍。江南竹木之鄉。採伐彌易。仰希弘紐。提拔將沉。故寺若存。新福更長。冀蒙矜允。幽顯沾恩。法事仰干。追深愧措。沙門某敬白。三月十一日。王答弟子總持和南。爰逮高旨。騰蔣州僧所及。竊以僧居望刹。食惟分衛。所立精舍。本依聚落。近年奉詔傳征。帛民伐罪。江東混一。海內人寧。塔安其堵。市不易業。斯亦智者備所明見。而忘啟頑民。不慚懷土。有苗恃險。敢恣螳螂。橫使寺塔。焚燒。如比屋流散。鐘梵輟響。雞犬不聞。廢寺同於火宅。持鉢略成空返。僧衆無依。實可傷歎。彼地福盡。

方成丘墟。所餘堂塔本不壞毀。其有現僧亦許房住。唯虛廊檐宇。會當倒壓。所以移來。還充寺館。其外椽版。權借築城。若空寺步廊。有完全者。亦貸爲府解。須一二年間。民力展息。即於上江結筏。以新副故。本勒所司。具條孔目。無慮零漏。恐遠僧未能曲見。頓用仰誣。必願言提。冥諸其掌。猥延滿禮。煉側良深。謹和南。述匡山寺書。江州匡山東林寺者。東晉鴈門慧遠法師之所創也。遠是彌天釋道安之高足。安是大和尚佛圖澄之弟子。三德相承。如日月星。真佛法梁棟。皆不可思議人也。而遠內闢半滿。外善三玄。德布遐方。聲高霄漢。初詣山。足依止一林。共耶舍禪師頭陀。其下若說若默。脩西方觀。末於林右。建立伽藍。因以爲名。東林之寺。遠自創。般若佛影二臺。謝靈運穿鑿流池三所。梁孝元構造重閣。莊嚴寺宇。即日宛然。峯頂寺者。是齊慧景禪師感山人延請。因棲其峯。次梁慧歸。在後登躡。方建伽藍。峯有水泉。忽然枯竭。歸燒香呪願。清流盈滿。天降甘露於泥洹。自是以先德名蹤。垂芳不斷。松霞清曠。觸處蕭條。公私往還。莫不歸向。自大化江左。貧道因至彼山。憇泊東林。時遊峯頂。以歲爲日。美翫忘勞。然山下伽藍。偏近驛道。行人歸去。頗成混雜。今奉請爲兩寺。檀越庶籍。影響衆得安心禮誦。虔誠用酌。洪澤并乞。勒彼所由。永禁公私。停泊沙門。某敬白。



王答 弟子總持和南垂誨。述江州潯陽廬山東林寺。峯頂寺。須令弟子  
並為檀越主。山嶺盤秀。下屬江湖。香爐層峯。上虧雲日。仙人之所戾止。隱  
倫於焉不歸。况乎慧遠法師。勝依結構。謝客梁元。穿池重閣。景師息心神  
應峯頂。智者憇歷踵武。前賢師嚴道尊。實深隨喜。所恨寡薄。無益將來。庶  
籍熏修。方證常樂。兼陳二寺。偏近驛道。行人往來。頗成混雜。須勒彼州。令  
去公私。使命不得停止。即付所司。依事頒下。謹和南。三月一日。王書與  
匡山三寺。極暄。法師道體何如。眾內咸宜也。鴈門遠法師。四依菩薩。翻飛  
朔野。棲息南山。息思以後。名德相繼。智者見命。為寺檀越。顧修寡薄。非敢  
克當。獎導既引。良深隨喜。敬德指此承問。楊廣和南。三月二十一日。與  
禪閣寺書。春序將謝。道體何如。僧眾清善。匡山佛寺。興自慧遠法師。法師  
師於彌天道安。安師於佛圖澄。妙德相承。莫之為最。江東龍巖。悉本鴈門。  
鴈門上人。創迹廬阜。自梁及晉。止有東林。陳晚澆漓。別生禪閣。僧徒好異。  
豈稱至和。智者爰居。還須合一。想均願海。更無異味。行人將送。過指此相。  
聞。楊廣和南。三月二十一日。與峯頂寺書。暮春暄和。寺眾清勝。禪悅  
法喜。致足恬懷。鑪峯香氣。煙霞共遠。智者經託勝地。為在總內。令為檀越。  
誠深隨喜。更追厚愧。善當敬勗。楊廣和南。三月二十一日。王謝法門書。

弟子總持和南奉旨今日齋竟。即事登舟。睽阻方遙。彌以傾欬。垂示法相。雖文旨淵蹟。源本難尋。而教門方便。開悟易益。恭承善誘。永以受持。庶籍津梁。得無退轉。自服膺至道。每沾弘護。將事遵途。復降良藥。沐浴慈被。伏用悽荷。謹和南。王遣使往匡山參書。弟子總持和南親信傳仲說還。逮去月朔。告用尉延。結熟猶熾。願道體休和。仰承經過。攝山鍾岫。寺塔安善。徒衆和肅。仍留二十僧。權停開善。進至匡嶽。結夏安居。東林禪閣。還爲一寺。峯頂精舍。復皆隨喜。敬緣勸發。獲此熏修。用耨身田。方流法雨。金光明福。喜荷彌深。弟子去月十四日始度朱方。風土異宜。流金在節。攝衛多不調適。每有劣然。二十九日來石頭。稍已平復。自江浦違心。馳情彭蠡。以日爲歲。無時暫忘。願未解夏前。預整裝束。法歲若滿。即事西浮。彼間酬願。務令在促。非但弟子蔽識。希護周爰。深恐禪慧學徒。咸思鑽仰。宣尼在陳。致歎自衛。便歸。屈道紆情。事非爲己。今遣主簿王灌。指往祇承。并貢別牒。用忘存著。敢略繁辭。謹和南七月一日。去衣六件。鹽一百斛。米一百斛。右件其鹽米。悉出江州正倉。王灌賫合魚。開送王重書。弟子總持和南。東林山寺使。至逮八月八日。誨用慰馳。結仰承已往衡山。至當稍久。法緣若竟。願即沿流。冀在歲陰。必期展覲。弟子渡江還。去月初移新。

住多有造次未善安立來肯勗以法事實用慙悚始於所居外援建立慧  
日道場安置照禪師以下江陵論法師亦已遠至於內援建立法雲道場  
安置潭州覺禪師已下即建深善輒以諮知仰承相次爲營功德深荷扶  
助難用遠陳而發此至江州遂下請僧料云何能得相資前施鹽米其米  
迴入東林鹽以上路盈長之外乃可別營功德今山僧返路行用仰酬尋  
別遣使迎延願預整歸計江山遼復豈盡成曲謹和南十月十日 王遣  
使潭州迎書 弟子總持和南歲聿云暮寒氣殊重禪悅經行願常安樂  
弟子頃來每多勞疾但睽覲稍久唯用傾結仰度所營功德已當究竟今  
遣左親信伏達奉迎願便事沿流延遲諮具謹和南十一月十五日 王  
遣使荊州迎書 弟子總持和南暄和道體勝念仰揆衡嶽法師久當圓  
滿江陵功德復應成就隨喜之至難用勝言弟子今入朝覲行次陝州馳  
仰之誠與時而積故遣使人迎候希便進道來月下旬唯遲祇接路首念  
促豈復委宣謹和南二月二十二日 王於長安遣書 弟子總持和南  
違移缺馳誠載勞兼事入朝彌增延屬武關雖阻荆近於吳是以暫停陝  
州遣使承接行人返命具奉覲縷非惟年尊疾動又已結夏安居理事相  
推固須停止弟子還鎮非久便願沿流仰會江都庶應旦夕將聖德果亦

復差機。因緣多端。請不勞慮。謹和南九月十日。弟子總持和南僧使智  
邃來。奉五月二日誨。用慰馳結。仰承衡嶽功德圓滿。便致荆巫。履涉虧和。  
深以傾悚。弟子於江都入朝。至陝關。眩矜停岐陽。腹內又不調適。去月末  
還京輦。如欲相承。猶自羸滿。未即祇覲。望雲延願。珍納行人。令返辭。豈宣  
具。謹和南。弟子總持和南。奉旨於荊州當陽縣境。玉泉山。陞為建造伽  
藍。招提行道。圖寫地形。具以賜示。伏以布金徧地。買園建立。奉置三尊。永  
流萬代。唱誦所不能讚。筭數所不能量。孰意輕微。頓蒙創造。循復來旨。爽  
然失厝。既事出神。心理生望。表無容違。拒苟作形迹。即具聞奏。嘉號乃覃。  
名符天冠。道場聲滿。恒沙世界。福報仰歸。遂辭難涉。謹和南。弟子總持  
和南。垂旨。今撰衡嶽禪師碑文。郭有道之無愧辭。高德逾此。陸士衡之披  
文想質。弟子多慚。既蒙獎成。不剋勵。邯鄲絕妙。深恐難工。還鎮病瘳。庶或  
勉強。循覽行狀。用難思議。佛澄道安。寧復過是。和南。弟子總持和南。垂  
賜萬春樹皮。袈裟一緣。述是梁武帝時。外國唯獻四領。今餘一。而是建初  
烏瓊法師所披。謹尋菩薩戒。稱所著袈裟。皆染使壞。色况復自然。嘉樹妙  
彩。天成相應之言。無勞外假。萬春表長生之稱。二翼合善。譬之辭。永服周  
旋。恒充布薩常事。半月。豈唯元日。著如來衣。深荷慈獎。謹和南。弟子總持

和南率施別牒五彩播錦香爐檀等十種示表微誠。薄申法貺。甚陋追悚。謹和南五色四十九尺幡二張。五色班羅經中二枚。絹五十疋。錦香爐檀十張。熏陸香二斤。剃刀十口。鷄納袈裟一領。油鐵鉢十口。雄黃七斤。青須彌氈五領。右牒文皇帝敕。給荊州玉泉寺額。皇帝敬問修禪寺知顛禪師。省書具至意。孟秋餘熱。道體何如。熏修禪悅。有以怡慰。所須寺名額。今依來請。智邃師還。指宣往意。開皇十三年七月二十三日。兼內史令蜀王臣秀宣內史侍郎武安子臣李元慘。奉內史舍人長坦男臣鄭子良行。王在京遣書。弟子總持和南。仰違已久。馳係實深。獻歲非遙。傾遲虔禮。暮春屆節。當遣奉候。謹和南九月二十四日。王在京重遣。弟子總持和南。適逮近旨。用慰馳情。春暄願道體康勝。玉泉創立道場。嚴整禪眾。歸集靜慧。日新隨喜之深。難以辭諭。弟子始服三石散。竟調息勞心。秋仲歸蕃。請夏訖。汭下在於拜覬。差當匪奢。其間玲德。今遣統軍魯子譽往。祇承謹和南。王從駕東岱。於路書。弟子總持和南。仲秋轉冷。仰惟道體康念。弟子即日粗可行。未由虔禮。但增延結。願珍德。謹遣修承。謹和南於路次書。總持和南寒氣漸嚴。仰惟康豫。動寂怡神。興居安悅。弟子陪奉鑿駕。旅次長奉。遠憑勝力。行往安隱。瞻言祇覲。庶

或匪遙。願珍重。此不宣具。謹和南十月十九日。王還蕃遣迎書。弟子  
總持和南。獻歲春明。仰惟道體勝豫。禪悅法喜。眾咸集業。功歸有在。悉由  
明導。敬憶江都。暫欲西上。先到衡嶽。用賽師恩。次往渚宮。以報生處。虔承  
此旨。衛送大江。陽子臨流。具申來請。即蒙開許。還至觀濤。年來歲往。寒暑  
屢變。恭聞功德圓滿。遠難讚述。弟子多幸。生在佛家。過庭所聞。匪直詩禮  
轉輪。漸奉實惟。旦暮。今者陪扈鑿軼。發自京歸。言停洛陽。又止歷下。柴下  
望之禮。本自虞書。巡會之聲。盛於姬典。至尊憲章。先古。允叶人神。相風指  
南。奉朝東岱。以今月十一日吉辰。宗事云畢。于時天地載廓。日月增華。休  
氣神光。燭近被遠。靈芝競吐。山谷連木。並秀。官壇瘖聳。腹壁之徒。無鑿而  
自令愈。扶老携幼之侶。不謀而同到。臣子殫見。事非虛飾。一物得所。萬里  
斯應。師資至重。敢不稍聞。弟子從纓。蓄即辭行所。夾鍾將未。必屆揚州。今  
遣奉迎。便願沿下。餘春未盡。必希拜覲。其間珍德。續復祇承。謹和南正月  
二十日。王謝天冠。仍請淨名義疏。總持和南。前揆菩薩天冠。率爾式之。  
樣深嫌不工。即用呈簡。爰逮今製。思出神衿。圖比目連。妙逾郢匠。開士五  
明。此居其一。金剛種智。茲焉標萬。是智因地化物。不可思議。接引隨方。多  
能盡達。冠尊於身。端嚴稱首。跪承頂戴。覽鏡徘徊。有飾陋容。增華改觀。弟

子多幸。謬稟師資。無量劫來。悉憑開悟。色心無作。觸仰勝緣。度脫舟航。何慮不果。但戒爲基趾。信實行先。保解毗尼。昔年度受身。雖踈漏心。護明珠而。定品禪枝。屏散歸靜。猥以凡薄。荷國鎮蕃。爲子爲臣。難虧難怠。豈藉四緣。能入三昧。此非臆斷。實荷誠說。經稱非禪不智。非智不禪。定解相資。能證無漏。又電光斷結。其例甚多。慧解脫人。厥朋不少。即日欲服膺智斷。率先名教。永汎去流。兼同治國。未知底滯。可開化不。師嚴道尊。可降意不。宿世根淺。可發萌不。菩薩應機。可逗時不。若未堪敷化。且暫息緣。如可津梁。便開祕藏。書云。民生在三事之如一。況昇釋典而不從師。今之慊言。備瀝素款。成就事重請。棄飾辭。謹和南。六月二十一日。荅爰逮累翰。殷勤至法。匹夫行善。止度一身。仁王弘道。含生荷賴。蓋登地菩薩。應生大家。所以發心興隆大道。曷可量也。孰可比哉。貧道山僧。本懷夙至。於天台舊居。言念無捨。庶因世境安樂。更得寄趾幽林。仰爲行道。非唯城邑。近歲謬承人汎。擬迹師資。顧此踈蔽。以非時許。況聖澤日隆。復垂今命。省諸庸鄙。彌匪克堪。貧道稟承師教。禪慧頗持。耳去眼流。如華上水。採聽經論。其功既淺。賴荷禪門。憑定修習。比於專學數論。區分理乃弗違。業乖至熟。自非如來明達。種智高圓。檀林殊能。誰肯雙揖。泥乎去聖。滋遠。曉悟甚微。徒欲承

恩懼乖深寄有招幽譴。兼虧聖德。特願更迴神慮。別俟勝賢。妙果芳因。使無斷絕。經稱一句染神。歷劫不朽。大智慧海。信爲能入。固知深解大乘。佛法久住。功德易滿。智慧最高。守質抱愚。仰希聽覽。徒申庸俚。終不自宣。沙門某白。王重請書。五十。弟子總持和南。仰逮還旨。猶乘謙尊。循復久之。恍如自失。共功以學。貴承師事。推物論歷。求法界緣。厝心有在。若習毗曇。則滯有情著。若修三論。又入空過甚。成實雖復兼舉。猶帶小乘。釋論地持。但通一經之旨。如使次第徧修。僧家尚難盡備。况居俗而欲無崖。當今數論法師。無過此地。但恨不因禪發。多起諍心。達者無違。求那明偈。仰惟厚習善根。非一生得。初乃由學。俄逢聖境。南嶽禪師。親所記荊。說法第一。無以仰過。照禪師來。具述此事。于時心喜已域。寸誠智者。昔入陳朝。彼國明式。尾官大集。衆論鋒起。榮公強口。先被折角。兩瓊繼軌。截獲交綏。忍師讚缺。唯唱希有弟子。仰延之始。便事勝集。屈登無畏。釋難如流。親所聽聞。衆咸瞻仰。適承前往荆楚。講法華經。舊學名僧。莫不歸服。故知非禪不智。驗乎金口。此聞名僧所說。智者融會。盡有階差。譬若群流。歸乎大海。此之包舉。始得佛意。弟子即日而不依請。譬彼彌勒。今當問誰。唯願未得。令得未度。令度。樂說無窮。法施無盡。復使顧言。稽首虔拜。謹和南。六月二十五日。



題面錄後序。智者道傳三觀存乎一家之書。而德化兩朝。章安紀諸百錄。觀其始立制法。以肅內衆中。以動王臣。後論放生。以安昆蟲之類。昭昭乎廣大之化。璨如日星。所謂光宅天下者也。章安序云。胎示後昆。知盛德之在茲。為可信矣。鏤板雖已印行。而未經校勘。因將古本對證。且訛誤非一。遂改證前後。凡十餘處。庶披覽之際。無壅厥意。見此題者。可別訛正。蘇州北禪無量壽院傳。天台祖教。沙門淨梵題。

永樂大典卷之一萬九千七百三十八



永樂大典卷之一萬九千七百三十九 一屋

錄

沙門灌頂國清百錄三

王謝義疏。王論荊州諸寺書。書五十一。五十二。論還天台書五十三。王荅書五十四。王與達為儒書五十五。述度人出家書五十六。述放徒書五十七。荅施燭書五十八。王迎入城。王遣使入天台。書五十九。參六十。王遣使入天台書六十一。王書參疾六十二。發願疏六十三。遺囑書六十四。王荅遺旨文六十五。王建功德疏文六十六。王弔大眾文六十七。王建周忌功德六十八。天台眾謝功德啓六十八。天台眾賀啓六十九。天台眾謝造寺成啓六十。九。僧使對問荅六十九。皇太子敬靈龕文七十。皇太子設齋文七十一。皇太子令書七十二。天台眾謝啓七十三。重令書七十四。天台眾謝啓七十五。皇太子弘淨名疏書七十六。天台眾賀至尊七十七。至尊敕七十八。天台眾謝啓七十九。天台參啓八十。僧使對問荅八十一。敕一函八十二。敕立國清寺名八十三。表國清啓

八十四。敕度四十九人。法名八十五。國清衆謝啓八十六。敕報百  
司上表賀口敕八十七。口敕施幡八十八。敕造國清寺碑文八十九。  
玉泉寺碑九十。梁王書九十一。蔡徵書九十二。曇暹書九十三。  
惠岳書九十四。惠岳疏九十五。保恭疏九十六。柳顧言書九十  
七。吉藏書九十八。吉藏疏九十九。論放生書一百。  
王謝義疏五十一。弟子總持和南。逮旨送初卷義疏。跪承法寶。粗覽綱  
宗。悉擅負外耳。未曾故知龍樹代佛不可思議。今所著述。肉眼未覩明闇。  
謹復研尋。遲此覲接。謹和南。王論荊州諸寺書五十二。弟子總持和  
南。荊州玉泉十住兩寺。近既賜令檢校。今須書及江陵總管當勒所由。終  
聽僧使奢促。弟子仰蒙浮戒宿世因緣。稍希義理智波羅蜜。爰降開許。始  
制義疏。方憑沃荅。向入慧門。昔年仰請棲霞時。往觀行政。爲密迹朝發暮  
到。應可認決。不異邑居。行道本貴安心。寧勞過遠。天台之路。幸願輟情。屈  
已爲人。菩薩有賜於專契。弗敢違前。都未知淨人善心。已墮僧數。濟度無  
隔。唯用隨喜。謹和南。七月二十七日。重述天台書五十三。前所認天  
台山事。本聽後期。爰逮報示。不然夙志。棲霞乃言咫尺。非關本誓之心。天  
台既是寄終之地。所以恒思果遂。每囑弟子。恐命不待期。一旦無常。身充

禽鳥焚燒餘骨送往天台願得次生還棲山谷修業成辦乃可利人但仰  
赴義門多慙剪淺發心既重輒課庸微去聽慈恩庶無忽促政言天台營  
理本擬十方安立僧徒非專為己昔年修葺願創伽藍形可隨緣香燈難  
絕故欲遣修葺冀憑方便同途校具淨人得蒙勝舉并祈一旨事並前諮  
方乞寺名屈作檀越懼多煩沓未敢同時處處結緣功德彌大玉泉十住  
許垂恩為唯待教旨即遣僧使冀藉光威三寺遙荷伽藍未整功德已圓  
仰闡頻煩言何能謝沙門某白三月二十日王荅五十四總持和南  
復垂誨旨益具仁慈開士位懷隨感必應本誓願力何患不果政言服道  
日淺未堪違遠深憑護念開示悟入玉泉十住天台本居仰由勝功能得  
建立方須影響水至金剛江陵書及會稽教下並勒所司以時發遣謹和  
南七月二十九日王與上柱國蘄郡公荊州總管達奚儒書五十五  
智者禪師德尊望重近年紆道爰授淨戒今脩治彼州十住寺造立西祖  
玉泉寺並見請為檀越復聞公等多結勝緣大乘運通良深隨喜師今遣  
僧使志果法才二人還就玉泉寺法璨道慧法師十住寺道臻法師經理  
想加心影響獎成妙業公私覃福幽顯同賴法事遠白不復暄涼也揚廣  
呈八月二日荅度人出家五十六切以今月嘉辰菩薩應世奉為至

尊皇后報恩功德。鎔寫靈像。度人出家。現在因緣。福業無量。使五沙彌為弟子。輒當恭首。作說戒師。年歲既小。別須和尚。必選名德。為作依止。並賜法衣。即於眾前歡喜頂戴。沙門敬白。七月十九日。荅放徒流書五十七。開府學士柳顧言宣教。金光明行法。究竟如十五月清淨圓滿。恩放徒流。矜勉鞭罰。上開府潘惠達儀同張四娘等凡四十五人。賜令斟酌。謹即依事詢詳。切以一人出世。多人利益。溥善御俗。仰屬輪王。案此經云。若犯王法。繫縛枷鎖。諸苦惱等。悉令解脫。又灌頂經云。王當放赦屈厄之人。徒鑊解脫。王得其福。天下太平。雨澤以時。人民安樂。教旨符應。經文豈非宿殖德本。慈善根力。謬以多幸。忝此大緣。率勵僧徒。清齋洗浣。龍王注雨。甘澤並周。爰開獄門。杻械解脫。徒流原宥。莫不蹈舞。殿庭稱恩。感戴加復。送以勝幡。仍懸寶塔。登高散華。燒香朗燭。並留供設。說法開示。咸令向善。其僧法運等。雖著法衣。不能修心。身犯國憲。取穢道流。忍乃上來。戰深下耻。白大眾。留七日晨夜。訓賚暫依。儼黜使慙。誠獎耳沙門。某敬白。十月十六日。荅施燭書五十八。開府柳顧言宣教。以法歲圓滿。爰降勞問。并施金色新製香爐奩一具。法衣一通。綿絹百段。燭三十挺。紙二千張。上厨果食等。剎那不住。節序相催。老至易悲。觀心難諦。幸憑弘建。

正法省無戒慧實懼難銷香爐起峯蓮華奪豔忍辱離塵安行履躡經稱  
受用無作恒生燭俟夜燎紙擬淨名當機要施法事忘謝果食縑綺道場  
同沾歸法有在辭略言外沙門某敬白七月十五日王迎入城礙雨移日  
書五十九 總持和南雨乃要仰延暫阻明間若晴別當遣信謹和南七  
月二十六日 次迎入城書 總持和南霜寒道體康勝弟子還來甫爾  
未暇迎延馳誠已深今遣候接冀近祇覲謹和南九月十六日 王遣使  
入天台參書六十 總持和南麥序氣清道體和適福慧莊嚴與時高勝  
弟子至來未久粗復可行近頻降兩書爰垂示功德玄義刪削文句入初  
其舊維新從麗至妙會須披接方豁煙雲春律已謝夏坐方結敢遺經教  
涉暑出迎白露宵團秋風葉下必預舟楫迎覲江陽然仰勞著述已涉數  
載般若多障近願成功日就月將庶方啓沃率貢別牒示表虔誠在敬無  
文仰揆弘亮其聞珍德續事音語謹和南 納袈裟十領 龍鬚席二領  
須彌氈二領 猫牛酥三瓶 熏陸香一合 王遣使入天台迎書六  
十一 總持和南霜氣已緊蛟熱久祛方恐洞沔預取調適今遣奉迎祇  
禮非奢謹和南九月二十二日 王參病書六十二 總持和南仰承出  
天台已次到剡石城寺感惠未歇菩薩示疾在疾示愈但於翹誠交用悚

灼。今遣鑿李膺往處。治小得康損。願徐進路。遲禮覲無遠。謹和南發願文六十三。吳縣維衛迦葉二像。願更聚合脩復。鄖縣阿育王塔寺頽毀。願更脩治。剡縣十文彌勒石像。金色剝壞。願更莊嚴。右三處功德乞脩沙門某敬白。稽首和南。三世諸佛。伏惟法身無像。隨機顯現。淨土不毀。人衆見燒。滬瀆浮來。靈塔地涌。剡山天樂。通夢陸咸。三處尊儀。表代三世。慈善根力。利益斯土。但年深歲曩。聖跡凌遲。諸佛影像。若淪衆生。善根無寄。諱宿世有幸。忝預法門。德行輕微。功業無取。謬爲道俗所知。顧影羞躬。無以自處。上慙三寶。無興顯之能。下愧群生。少提拔之力。刻骨刻肌。將何所補。幸值明時。棟梁佛日。願藉皇風。又承衆力。將勸有緣。修治三處。先爲興顯。三世佛法。次爲擁護。大隨國土。下爲法界。一切衆生。若塔像莊嚴。則紹隆不絕。用報佛恩。若處處光新。國界自然。殊特妙好。則報至尊水土之澤。若見聞者。發菩提心。則利益一切。種出世業。但久域此心。緣障未果。此際赴期。西出氣疾。增動毒器。坏瓶固非。保惜先以身命。奉給三寶。謹聽威神。若形命停留。能生物善。不汙佛法者。伏聽使乞。早除差行。願速圓若命。雖未盡。方多魔障。損物善根。汙亂佛法者。豈須停世。願早灰滅。滅後以諸誓願。付囑後人。使經紀修立。乞三寶加建。速得圓滿。前於佛隴。金光明道。



場已發此願。今重於石尊。再述愚誠。伏願聖凡重垂攝受。謹疏開皇十七年十一月二十一日。遺書與晉王六十四。貧道初遇勝緣。發心之始。上期無生法忍。下求六根清淨。三業殷勤。一生望獲。不謂宿罪殃深。致諸留難。內無實德。外虛名譽。學徒強集。擅越自來。既不能絕域遠避。而復依違順彼。自招惱亂。道退行虧。應得不得。憂悔何補。上負三寶。下愧本心。此一恨也。然聖法既差。自審非分。欲以先師禪慧。授與學人。故留滯陳都八年。弘法諸來學者。或易悟而早亡。或隨分而自益。無兼他之才。空延教化。略成斷種。自行前關。利物次虛。再負先師百金之寄。此二恨也。而年既西夕。恒妙道思。值明時。願逢外護。初蒙四事。既勵朽年。師以學徒四十餘僧。三百許。日於江都行道。亦復開懷。待來問者。儻逢易悟。用荅王恩。而不見一人求禪求慧。與物無緣。頓至於此。謬當信施。化導無功。此三恨也。又作是念。此處無緣。餘方或有先因。荆潭之願。願報地思。大王弘慈。霈然垂許。於湘潭功德。粗展微心。雖結緣者衆。孰堪委業。初謂緣者不來。今則往求不得。推想既謬。此四恨也。於荊州法集。聽衆一千餘。僧學禪三百。州司惶慮。謂乖國式。豈可聚衆用惱官人。故朝同雲合。暮如雨散。設有善萌。不獲增長。此乃世調無堪。不能諧和。得所五恨也。既再遊江都。聖心重法。令著

淨名疏。不揆闇識。輒述偏懷。玄義始竟。麾蓋入謁。復許東歸。而吳會之僧。咸欣聽學。山間虛乏。不可聚衆。束心待出。訪求法門。暮年衰弱。許當開化。今出期既斷。法緣亦絕。此六恨也。在山兩夏。專治玄義。進解經文。至佛道品。為三十一卷。將身不慎。遂動熱渴。一百餘日。競疾治改。際此夏末。慮有追呼。束裝待期。去月十七日。使人至山。止留一宿。遽此螢光。早希進路。行過剡嶺。次至石城。氣疾兼篤。不能復前。此之義疏。口授。出本一編。自治。皆未揀簡。經論僻謬。尚多不堪。流布既為。王造寧羞。其拙囑弟子抄寫。後本仰簡。前所送玄義及入文者。請付弟子焚之。天挺睿智。願一徧開。讀覽其大意。餘無可觀。貧道灰壤。雖謝願留。心佛法詢訪勝德。使義門無廢。深窮佛教。治道益明。徧行徧學。是菩薩行。如來滅度。法付國王。貧道何人。慧門憑委。欣然就盡。沒有餘榮。但著述延歲。文義不同。悵然自慙。生來所以周章者。皆為佛法。為國土。為衆生。今得法門。仰寄三為具足。六根釋矣。命盡之後。若有神力。誓當影護王之土境。使願法流行。以荅王恩。以副本志。菩薩誓願。誠而不欺。香火義深。安知仰謝。願觀泡幻。知有為法。一切無常。會而不離。終不可得。唯當勤戒。施惠以拒。四山早求。出要豈須。傷法煩勞。聖懷蓮華香爐。犀角如意。是王所施。今以仰別。願德香遐。遠長保如意也。南

嶽大師滅度之後。未有碑頌。前蒙教許。自制願不忘此旨。南嶽師於潭州立大明寺。彌天道安於荊州。立上明寺。前蒙教影護。願光飾先德。爲作檀越主。貧道在世六十年。未嘗作有爲功德。年暮力弱。多闕用心。又香火施重。近於荊州。仰爲造玉泉寺。脩治十住寺。並蒙教囑。彼總管蘄郡公達奚儒僧。賫教書至夏口。而蘄公亡。書未及付。慈恩已足。願爲玉泉作檀越主。今天台頂寺。茅菴稍整。山下一處。非常之好。又更仰爲立一伽藍。始前木位基。命弟子營立。不見寺成。冥目爲恨。天台未有公額。願乞一名。移荊州玉泉寺。貫十僧。往天台守乞廢寺田。爲天台基業。寺圖并石像。發願疏。悉留仰簡。泰平聖世。皇風整肅。菩薩淨土。不可思議。切見諸州迭送租米。車脚皆三五倍。於公歛不多。私費爲重。典章處分。別有深規。貧道不閑。忽言國式。輒謂無米之州。運送宜爾。有米之州。當地輸送。則無此私費。管窺未見理。若於式有妨。請不須論。於事有益。願爲諮奏。使蒼生慶賴。然國是王國民。是王民。加修慈心。撫育黎庶。犬馬識養。人豈忘恩乎。昔聞齊高氏見負炭兵。形容憔悴。愍其辛苦。放令出家。唯一人樂去。齊主歎曰。人皆有妻子之愛。誰肯孤房獨宿。瞪視四壁。自儻山林。以此觀之。出家難得。今天下曠大賦。歛寬平。出家者少。老僧零落日。就減前貫。帳時或隨緣聽學。或山

林修道不及帳名。雖復用心。常懷憂懼。此例不多。悉有行業。願許其貫首。則是度人出家。增益僧眾。熾然佛法。得何量功德。昔三方鼎立。用武惜人。今太平一軌。修文修福。正是其宜。又未法眾僧多。行不稱服。尚不挾人意。况扶經律。王秉國法。兼匡佛教。有罪者治之。無罪者敬之。起平等不可思議心。則功德無量。此等之事。本欲面諮。未逢機會。奄成遺囑。亦是為佛法為國土為眾生。若能留心功德。仰賽臨命口授。言盡力窮。期迫戀多。知復分說大善知識。菩提為期沙門。開皇十七年十一月。王荅遺旨文六十五。菩薩戒弟子總持稽首和南。先師天台智者內弟子灌頂普明至奉去十七年十一月二十一日遺書七紙。手迹四十六字。并淨名義疏三十一卷。犀角如意。蓮華香爐等。跪對脩讀。摧振于心。舍利儼然。德音具在。迦葉狼迹。身證遙追。曇光天台安禪。近躡誠復如來。雙林四部號慟。而涅槃遺教法更殷重。况乎五百歲後。四依拯溺。深順佛旨。居世同凡。將欲泥洹。現希有事。五品十信。已自皎然。彌陀觀音。親來接引。去德茲永。乃增悲戀。追悟今生。還慶夙稟。所恨淨名經疏。不重親承。由冀尋研。用補咎悔。追惟障惱。現機未發。逖聽前聞。亦有成就。非徒悟有淺深。抑又時或早晚。佛滅度後。得聖巨多。道耀他方。冥來曉示。在思即世。忽奉大師良由宿緣。積曾

親近愛。羣來命必垂影響。不捨本誓。筆迹具存。是用歸誠。憑靈戒懇。跪受經疏。如意香爐。虔禮西方。心口相誓。手探卷軸。最後殷勤。即於今月十八日。仍感瑞夢。是知濟度。已降舟航。唯願即日在寶池。遙開蓮華。今居淨域。近溉濁心。世世生生。師資不闕。革凡登聖。給侍無虧。但義府鈞深。遺文淵博。雖加策駘。終畏面牆。特希溉以醍醐。如出香乳。照以暗并。即顯真金。然後仰籍神通。俯厲精力。別詢名僧。奉揚法味。普共含生。作大利益。斯則弗違提獎。同登彼岸。最勝最上。就此為尊。灌頂所送。最後淨名義疏三十一卷。至佛道品。謹即裝治。善盡習讀。逮旨爾前。玄義及入文解釋。付弟子焚之。即付還。使遣對燒。蕩屏角如意。蓮華香爐。遠以垂別。輒當服之。無數。永充法事。今奉施瓷瓦香爐。供養龕室。遺旨以天台山。下遇得一處。非常之好。垂為造寺。始得開翦。林木位置基階。今遣司馬王弘。創建伽藍。一遵指畫。寺須公額。并立嘉名。亦不違旨。佛隴頭陀。並各仍舊。使移荊州玉泉十僧。守天台者。今山內現前之衆。多是渚宮之人。已皆約勒。不使張散。豈直十僧而已。所求廢寺水田。以充基業。亦勒王弘。施肥田良地。深蒙擁護。當年別資。給行送經一歲。依法為先。師別供養。具鍾幡香等。又施錢直。且充日費。鄆境靈塔。吳內石像。剡縣彌勒尊儀。卧疾之處。並使裝飾。亦不仰異。

荆州玉泉寺。既是為造。理當異餘道場。其潭州大明寺。荊州十住上明寺等。先以敬許為檀越。無容復乖。今誨使製南嶽師碑。即命開府學士柳顧言為序。自撰銘頌。所囑僧有罪治無罪平等。切以涅槃羯磨。經有誠文。正論治國。金光明品。住持三寶。弗敢墜失。又令加脩慈心。撫育民庶。犬馬識養人。豈忘恩。蓋聞外書為教。仁尚恕物。內典居宗。大慈為首。在文雖異。詣理實同。不有君子。其能為國。不有菩薩。豈濟含生。又以僧未貫籍。許其出首。適奉詔書。冥符來及。見機而作。所謂後天而奉天時。糧運轉輸。深關軍國。前已表聞。所司未報。終當方便。必期諧果。及承寄囑。斯復能照他心。前來仰答。無違意旨。庶籍熏修。福祐國家。灌頂普明。面引詢訪。具述遺形。宴坐。宛若平生。轉恨失時。不重餐義味。仰揆定力。如須彌峙。法臘云竟。切願輿迎。一到江陽。還入禪眾。道俗接足。人神頂禮。即當奉送。復彼山龕。庶籍瞻仰。能開心目。深願道力。不孤所請。雖厚恩申報。具在願文。而實宜加趺。實須酬仰。二僧。今反輕奉報書。遂拜靈儀。心鳴載咽。謹和南開皇十八年正月二十日。王遣使入天台。建功德願文六十六。菩薩戒弟子總持和南。十方三世諸佛。一切尊法。三乘聖眾。上界天仙。龍神他心。道眼護持。應現。略塞虛空。無量幽顯。切聞諸佛菩薩。不捨本誓。為天人師。拔濟含識。次

令和尚闍梨代作宗範。引接後來。與佛無異。資敬之重。具在經律。不有明導。豈濟苦海。匪報厚德。豈收福田。遺行可追。謹依佛語。菩薩戒先師天台智者。來踰剡嶺。遷化石城。初聞訊至。哀情摧勳。敬惟勝行。逾滿熙連。佛許臨終。自說所得。今開侍者所書。巨有異相。稱我位居五品弟子。事在法華十住。信心誠文。具瓔珞。於是空聲異響。徧滿山房。索披大衣。云觀音來至。驗知入決定聚。面覩彌陀。靜攝遷神。安坐身證。久移晦朔。容相儼然。斯蓋無量劫來。檀慧具足。深護佛法。發起群生。非無顯晦。出沒其孰能於此。歟。有始有終者。其唯聖人乎。設以辯才。千萬億偈。讚師福慧。終不能盡。夏初遺信到山。期法歲竟。迎接僧臘。既滿尚疑。谿谷毒勵。意取氣交。霜雪杯渡。鏡水及屆。剡下便承。卧痾。豈言信次。騰神淨域。遂不獲重音容。再諮法味。維摩義疏。蘊而莫宣。良由宿障根深。致違心契。已誨於前。須補于後。近於此州。禪衆舊居。雖仰爲設會。并就天台。指畫之地。則造寺塔。而於彼山頭。陀之處。未獲熏脩。今夤覽別書。囑寄佛法。不思議事。感歎銘衿。無已之誠。今遣往於佛隴。峯頂集衆。結齋願承三寶之力。速達西方。智者證知淨土。記剝生生世世。長爲大師弟子。未得佛前。早相度脫。不棄緣感。弘到菩提。并乞衆力。爲弟子懺悔。自從無明住地以來。至于今日。恒沙惑障。煩惱迷。

昏五蓋十纏輪迴界內八萬四千塵勞增長願憑積慶及茲功德衆罪霜  
露慧日消除衆善普會法雨洋溢神通道力照藹皇家寶祚靈長羣被億  
兆開皇十八年正月二十九日王弔山衆文六十七正月二十九日  
總持和南白諸行無常是生滅法諸佛及緣覺尚捨無常身大師智者移  
應遷神哀摧抽惱不能自勝念當戀慕追慟難忍永矣柰何當復柰何侍  
者灌頂普明二人賁送別書觀心論淨名疏犀角如意蓮華香爐并智越  
法師一衆啓見對增嘸德音若存即遣條流移神靈迹祥瑞炳著自述分  
明舍利全身于今安坐非證聲聞小果定入菩薩大位素聞得法華三昧  
方驗不退法輪面覩彌陀觀音大勢至以宿命智反照斯土四部弟子豈  
不努力自揆寡薄無以申報唯當敬依付囑不敢捥忘應建伽藍指畫區  
域須達引繩天宮即應至金剛際既有要道當建繕造一遵本意昔宣尼  
去汝弟子守墓三年子貢之徒乃至六載况乎方置精舍永樹福基彼現  
前僧慎勿張散但使謀道何患無食期取來生西方非遠必若懈退寶池  
極遙今遣使人於佛隴峯頂處誠懺禮修福建齋具如願文略伸鄙意二  
僧令返指此慰書楊廣白十一月五日天台山衆謝啓天台沙門智  
越一衆啓司馬王弘至僧使灌頂普明還奉正月二十九日教賜垂慰問



并宣口教優訪殷勤。謹對龕門焚香跪讀。言理哀切。痛絕魂心。遣囑累從  
亡存。戴荷師在之日。常有誨云。今得寺基。爲王創造。非爾小僧所辨。別有  
大力。勢人。後當成就。恨吾不見。寺成爾時。莫測所由。今當蒙繕造。方醒前  
記。冥相符合。不可思議。經歲法寶出世。舟航諸佛。所師衆生津導。永鎮佛  
隴。依止受持。鍾幡香等。施安供養。法鼓警悟。利益人千。僧法會功德圓滿。  
伏審幽靈慈悲。遠鑑謹於齋日。披讀願文。法席悚心。求入願海。蒙資齋糧。  
恩給田地。基業無盡。施命無窮。有待多煩。隆恩難答。教旨結是現前。僧不  
令張散。伏惟弘護。事重精舍。將圓同學。門人方憑依止。龕室儼然。何心違  
離。况垂嚴教。益懼丹誠。謹當克厲。倍加心力。但一衆失廕。求遠慈願。追慶  
夙緣。還蒙覆護。欣悲交至。臨啓涕零。謹啓。開皇十八年二月十五日。王  
遣使入天台。設周忌書六十八。歲序推移。日月如逝。智者遷化。已將一  
周。追深悲痛。情不能已。念哀慕感。慟何堪自居。今遣典籤吳景賢。往彼設  
齋奉爲亡日追福。遲知一二。揚廣和南。開皇十八年。山衆謝啓六十八。  
天白沙門智越一衆。啓。典籤吳景賢至。奉教爲先師亡日設齋。僧衆五  
百。一時雲集。冥途雖隔。感應道通。越等不能灰滅。及諱晨。追慕慈顏。悲哽  
稽首。教淚啣餐。不勝荷戴。謹啓謝聞。謹啓。衆賀啓六十九。天台寺故

智者弟子沙門智越一衆啓。伏惟殿下睿德自天，恭膺儲副，生民慶賴，萬國歡寧。凡在道俗，莫不舞抃。况復越等早蒙覆護，曲奉慈惠，不任悅豫之誠。謹遣僧使灌頂智琛等奉啓，以聞。謹啓。衆謝造寺成啓。仁壽元年十月三日六十八。天台寺故智者弟子沙門智越一衆啓。伏聞龍樹遷化，天竺爲立伽藍。寶誌云：亡梁國盛修開善，良由菩薩本誓，互相顯發。凡是聲聞，但知稱讚。伏惟亡以和尚具難思之德，作天人之師，安禪涅槃，示希有事。披按經律千載一聞，妙德昭彰，興於聖世。伏惟尊師重道，爰繕伽藍，建立之所甚得。山相先師嘗言：其地必待良緣。追尋此記，彌會今日。即寺居五峯之內，夾兩澗之流。堂殿華敞，房宇嚴秘。方之淨土，用集神仙。成就已來，先師恒垂影迹。聖境雖遙，有感斯應。既興塔廟，故現靈竒。爰示諸諸咸同攝受，越等庸薄，謬齒門徒。仰慙棟宇，俯勵心力。常於寺內，別修齋懺。恒專禪禮，庶籍熏修。奉酬聖澤，不任喜荷。謹遣使灌頂智琛奉啓謝聞。謹啓。僧使對皇太子問荅六十九。仁壽元年十一月初三日右庶子張衡宣令僧使灌頂智琛進內齋，令旨自問先師亡後有何靈異。對云：先師以開皇十七年十一月二十四日結加趺坐，遷神入滅。到十八年四月十六日，衆於初夜各就繩牀，方欲攝念。僧名道脩見先師服本衣裳，手提

竹伏從西戶入。倚望少時。從同心淨域勝土莊嚴。幸僧衆無虧熏練。不輟  
冥力深扶。人功多愧。令遣員外散騎侍郎兼通事舍人張乾威送僧使灌  
頂等還山。於寺設會。稽首接足。十方三世一切三寶。無量幽顯。現前大眾。  
以此功德。仰資先師智者。早證正覺。具如臨終。證現已生安養。頃來留瑞。  
久現彌陀。踵武觀音。連衡大勢。迴眸東視。不捨娑婆。轉睇南閻。彌憐震旦。  
滄溟巨海。尚不護於涓流。嵩華峻極。安苟排於微壘。敢陳薄供。願垂攝受。  
當使無邊法身。盡承甘露。無量化影。咸進醍醐。涅槃粲之不可窮。般若味  
之而不竭。盡我念力。遵我師道。銷我煩惱。滿我誓願。現在未來。長慧提拔。  
家國眷屬。俱入大乘。密往潛來。恒垂影響。塵勞障累。銷除隱塞。究竟等虛  
空。圓滿如法界。斯則大師勝力。諸佛荷擔。弟子銜慈。出如來藏。無離文字。  
以求解脫。文字之性。即解脫也。不著世間。如蓮華常善入於空寂行。達諸  
法相。無罣礙。稽首如空無所依。皇太子於天台設齋願文七十一。 菩  
薩戒弟子皇太子總持稽首和南。十方三世法佛報佛應佛法身。應身化  
身。諸佛所師。所謂法也。以法常故。諸佛亦常。佛常法常。比丘僧常。世間皆  
空而實不空。諸佛妙有而實不有。不有而有。不空而空。至寂恬然。始名至  
樂。凡情弊報。皆生極苦。迷之者則生盲。皓首得之者則罔像玄珠。弟子幸

憑勝緣微因宿種方便智度生在佛家至尊皇后慈仁胎教有八王子日月燈明之恩十六沙彌大通智勝之勳加以筭蒞淮海欽尚釋門先師天台智者顓禪師膺請江都授菩薩戒由是開悟歸憑有在而夢楹託諷梁木先顏合掌安禪端坐示滅于今數載儼然若思適現儀形續於光燄彈指之聲震于龕室僧使報述遐邇聳踊皆由佛法僧力感應相關汲引含靈故現斯瑞肅奉明詔暫輟監國巡慰淮海銜顓毗黎思報佛恩少酬師道以今大隨仁壽元年歲次辛酉十二月十七日謹遣員外散騎侍郎通事舍人張乾威到天台山寺敬設蔬飯雖調八水多慙百味庶同純陀之味供有如淨名之遙請色香細軟徧滿十方歡喜甘餐寧唯百億天仙龍神並希雲布任持世界盡望星羅以智者之分身納師資之攝受經稱信爲能入智爲能度願銷甘露咸濟苦海應變穢土通同淨國天覆地載長轉金輪七廟六宗永安玉座本致百世紹隆萬紀男女緇素皆深大乘水陸空行咸知佛性須彌入於芥子未足成難食頃猶如巨劫曷以爲怪井蛙不識江海蛟睫安知鵬翼以我今懺並乞冰銷以我今誠皆入願海發菩提心徧在諸物菩提心者即是佛心下度衆生上求佛果不可以身得不可以心得以無所得即菩提心無所得即是得無所得稽首歸命十方

三寶。皇太子令書與天台山衆七十二。僧使灌頂智瑛至覽十一月  
三日書并陳靈龕應迹現形放光禪指流音應念傳響斯實不思議力變  
化多方感悟有緣示希有事慎終追遠感歎相深在昔雙林示滅非滅多  
寶獨塔俟時爨現爨在狼迹迦葉分身乃至就山迦文留影肩毫散彩指  
端震室豈非像教能度無邊是大因緣聞善知識永惟宿昔獲承師範德  
音盈耳神光在目方憑靈瑞係踵菩提肅承靈誥宣慰南服山衆法徒同  
志爲友會成等侶方共舟航歲暮凝寒念皆道勝天台名嶽海岸所推脩  
建大林多慙重閣三時設供四事不周相甘禪悅以同法喜其間敬德信  
次相聞今遣員外散騎侍郎張乾威送僧使還山於舊所設供庶同甘露  
能變麤澁亦運香積證道融銷書不盡言反此無悉揚廣和南僧使灌頂  
等所領今施物目仁壽元年十二月十七日白石香爐一具并香合三  
枚大銅鐘一口鷄納袈裟一領鷄納褊袒二領四十九尺幡七  
口黃綾裙一腰羶二百領絲布祇文二領小幡一百口和香  
二合胡桃一籠衣物三百段奈麩一合石鹽一合酥六餅

衆謝啓 天台寺故智者弟子沙門智越一衆啓使人兼通事舍人張乾  
威至謹領前件物等並皆完淨仍即陳羅先師舍利龕前具宣來令并唱

施物。又千僧法齋。伏惟弘護。殷勤慈澤。周至香爐。微妙天匠。莊嚴洪鍾。和雅震集。凡聖勝旃。舒旃疑懸。梵宮酥麩。鹽桃請同。香積法衣。淨飾無著。離塵。檀物豐多。驚眩視聽。千僧雲集。布滿山庭。爰降王人。光顯林谷。奉對靈龕。必神通攝受。標擬眾聖。冀願海莊嚴。越等凡微。謬當恩沐。慈潤重沓。難可克勝。合眾虔虔。如履冰刃。不任載荷之至。謹啓謝聞。謹啓。仁壽二年正月六日。皇太子重令書七十四。灌頂智瑛等至枉寺眾來書。財施爲輕。法門標重。檀波羅蜜。般若尊成。不具兩緣。寧俱解脫。施奇咸共忘言。理至迹指。寧復辭弗。揚廣和南。右庶子王弘宣令施天台物目。飛龍綾法衣一百六十領。幡一百五十張。光明鹽一石。酥五餅。眾謝啓。天台寺故智者弟子沙門智越一眾啓。慈澤隆重。喜捨頻煩。僧使後還。復垂恩賚。雜彩勝幡。莊嚴殿宇。綾羅法服。光洽眾僧。猶酥五餅。充去身患。光明一斛。藥食兼濃。越等山野。糞掃分衛。今則被服溫華。食味珍甘。不自度量。彌增戰懼。不任敬悚。謹啓謝聞。謹啓。仁壽二年四月十五日。右庶子張衝宣令慧日道場僧慧莊法論二師。於東宮講淨名經。全用智者疏判釋經文。一日兩時。躬親臨聽。令揚州總管府遣參軍張諧到天台。有諳委智者法華義者一人。仍賫疏入京。使到寺。寺差灌頂隨使。應令疏到付。

司繕寫寫竟付灌頂校勘。勘訖入宮受持。右庶子張衡宣令引灌頂入辭面奏。仁壽二年八月十八日。令旨云。弟子重先師法門。故相勞苦。師亦須爲法。勿以爲辭。今遣大都督段智興送師還寺。爲和南大衆。好依先師法用行道。勿損風望也。好去。并有布施。飛龍綾法衣三百二十領。猫牛酥兩餅。光明鹽一斛。右庶子張衡宣令別賜灌頂物。金縷成彌勒像。并夾侍菩薩。聖僧周匝五十三佛。織成經檀七張。織成經袋二口。熏陸香一百斤。酥合和香一斤。又令書一函。與衆又遣揚州司功參軍蔡恪到。爲智者設千僧齋。仁壽四年。皇太子登極。衆遣賀啓。七十七天台寺沙門智越一衆啓。竊聞金輪紺寶。弈世相傳。重離少陽。時垂御辨。伏惟皇帝菩薩。聖業平成。纂臨洪祚。四海萬邦。道俗稱幸。越等不任喜踊之至。謹遣僧使智琛奉啓以聞。謹啓。仁壽四年十一月三日。括州臨海縣天台寺僧智越等啓。皇帝敬問括州天台寺沙門智越法師等。餘寒道體如宜也。僧使智琛至。得書具意。大業元年正月十三日。柱國內史令莒國公。臣未上大都督。兼內史侍郎。臣虞世基。兼內史舍人。臣封德尋舍人。封德尋宣勅。僧使智琛云。師能如此遠來。在道寒苦。好去還寺。宣朕意向大衆好行道。勿損先師風望。右僕射蘇宣勅。賜天台寺物五百段。

至揚州庫叅軍向德元送物到寺。衆謝啓。天台寺沙門智越等啓。使  
智璪還奉宣。正月十三日敕旨。并施物五百段。謹即集衆佛前。敬對使人  
如法呪願。越等有幸。喜逢聖世。伏蒙慈教。喜懼已隆。復領厚資。恩賜彌重。  
竊惟輪王地水。已覺難消。况天府妙物。寧恭受用。庶藉教慈。又承佛力。罄  
竭心膂。導師遺訓。專修禮誦。上答天澤。不任悚荷之至。謹附揚州使。奉謝  
以聞。謹啓。大業元年三月十七日。輿駕巡江都宮。寺衆叅啓。天台寺沙  
門智越一衆啓。仲秋已冷。伏惟皇帝陛下。起居萬福。越等早蒙垂覆。曲荷  
慈恩。山衆常得安心。奉國行道。伏聞輿駕。巡撫江都。寺衆欣踊。不任馳戀  
之誠。謹遣僧使智璪。奉啓以聞。謹啓。大業元年八月三十日。九月十九日。  
僧使智璪於楚州華林園。通起居表。通事舍人李大方宣。敕云。師能如  
許遠道來。在路辛苦。至揚州與師相見。九月二十六日。共諸州僧使。引對  
大牙殿前。邳國公蘇威宣。敕云。和南師等。漸冷。師等各堪行道。弟子巡  
撫舊住。師等故能來相覓。師等好去。十一月二十日。舍人李大方。引入殿  
口。敕云。師上座坐。坐訖。黃門侍郎張衡宣。敕云。師等是先師之寺。僧衆  
和合。不相諍競。是非不。璪欲起對。敕云。師坐。師坐勿起。璪對云。門人一  
衆。掃灑先師之寺。上下和如水乳。盡此一生。奉國行道。不敢有競。是非。常




以寒心戰懼。敕云好。張衡又宣。敕云。師等既是先師之寺。行道與諸處同為。當有異。對云。先師之法。與諸寺有異。六時行道。四時坐禪。處別。行道場常以行法奉為至尊。敕旨云。大好大好。張衡又宣。敕云。師等既是行道之眾。勿容受北僧及外州客僧。乃至私度出家。冒死相替。頗多假偽。並不得容受。對云。天台一寺。即是天之所覆。寺立常常。不敢容外邑客僧。乃至私度以生代死。敕云。好。張衡又宣。敕云。弟子為先師度四十九人出家。停寺受業。紹繼於後。師可檢校有道心者。必須係籍人。非私度者。對云。爾。張衡又宣。敕云。爾後更開先師龕。以不對云。仁壽元年。奉敕開。竟爾後更不敢開。敕旨云。知。張衡又宣。敕云。師還寺不。更開先師龕。必當大異。對云。爾。敕旨云。弟子欲為先師造碑。先師有若為行狀。對云。先師從生以來。訖至無常。其間靈異。非止一條。並是弟子灌頂記錄為行狀一卷。由在山內。未敢啓。敕云。大好大好。弟子正欲為先師造碑。師等可即將隨使人出。對云。爾。張衡又宣。敕云。問灌頂師何在。對云。灌頂師在寺。本應出奉。參見。為患痢四十餘日。不堪在道。敕云。好。張衡又宣。敕云。師等僧悉在寺。不。勿使名係在寺。身住於外。對云。先師在世。有十條制。約名係於寺。若身居別處。則不同止。敕云。大好大好。張衡又宣。敕云。師寺舍。

有穿漏欹斜。不對云。當起寺時。既是春初。竹木並非時節。至今已有穿漏。亦得臨海鎮官人恒檢校修理。敕云。好。若未整頓。弟子即敕使人檢校。對云。爾張衡又宣。敕云。施師物充師等衣資。勿作餘用。欲作功德。亦得。須得弟子意。弟子看師與餘有異。供給繼連。必令不斷。勿使寺僧在外多求。損先師之後。對云。爾張衡又宣。敕云。弟子遣使送師等還寺。為先師作功德。度人出家。竟可開師龕。必當大異。師可急去。功德竟。師等即隨使人出。對云。爾瑛等起辭。敕云。弟子已荅大衆書。竟對云。爾辭出。到棲靈寺。秘書監柳顧言來宣。敕云。我意令公為智者製碑。若非公作。則不得我心。可語僧使急將行狀出。至二月。即取碑成。敕揚州僧五十人云。經論之內。若為尊於師氏。勝於智者。又前為智者造寺。權因山稱經論之內。復有勝名。可各述所懷。朕自詳擇。諸僧表戒師有行者。聖表寺為禪門五淨居。其表未奏。僧使智瑛啓云。昔陣世有定光禪師。德行難測。遷神已後。智者夢見其靈云。今欲造寺。未是其時。若三國為一家。有大力勢人。當為禪師起寺。寺若成。國即清。必呼為國清寺。伏聞敕旨。欲立寺名。不敢默然。謹以啓聞。謹啓。通事舍人李大方奏聞。敕云。此是我先師之靈瑞。即用即用。可取大牙殿。勝琪以雌黃書。以大篆付使人安寺門。

永樂大典卷之一萬九千七百三十九





重錄總校官侍郎臣陳以勤

學士臣王大任

分校官侍讀臣王希烈

書寫儒士臣湯應龍

圈點監生臣教河

第

一

卷

上

第

一

第

一

卷

上

第

一

第

一

卷

上

第

一

第

一

卷

上

第

一

第

一

卷

上

第

一

第

一

卷

上

第

一

第

一

卷

上

第

一

第

一

卷

上

第

一

第

一

卷

上

第

一



